

東
華
續
錄

東華續錄

同治三十六

臣王先謙敬編

臣張式恭恭校

秋七月己亥朔 上詣 奉先殿 大高殿行禮告捷詣景山

關帝廟拈香○諭議政王軍機大臣等楊岳斌沈葆楨奏官軍力
攻崇仁疊勝並進剿東鄉金谿踞賊情形暨南豐鐵子嶺一帶剿
賊獲勝各摺片侍逆盤踞崇仁經江忠朝席寶田兩軍分路進攻
殺斃賊目不少侍逆右臂受傷江忠朝等復分令各營進攻賊壘
直逼城根周寬世等亦敗賊於上頓渡王開琳王德榜移駐七星
橋與周寬世合圍東鄉進規金谿僞老王宗李元茂糾合南豐股
匪竄踞鐵子嶺一帶爲崇逆聲援劉典督劉勝祥等分左右兩路
縱擊擒斬甚眾鐵子嶺一帶賊館一律肅清是崇仁等城雖未遽

能克復而各路進兵均尙得手前因楊岳斌奏賊圖力攻撫建橫
踞崇仁等處漸成長圍之勢擬先由崇宜下手破其狡謀當以所
籌深合機宜諭令該督等會商辦理見在江忠朝等進兵崇仁侍
逆右臂受傷該逆與李秀城均係一時悍黨李秀城既經就擒該
逆諒不能久稽顯戮著楊岳斌沈葆楨督飭江忠朝等鼓勇前進
迅克崇仁破賊包鈔之計東鄉上頓渡許灣等處逆勢漸已不支
卽著飭令王開琳周寬世等會攻東鄉乘勝規復金谿毋稍鬆勁
南豐賊踞已久若不及早誅鋤大爲腹地之患鐵子嶺已克我軍
得其要隘卽著督飭劉典會合精毅等營節節進剿將僞王老宗
股逆奮力剿擊攻克南豐縣城以期廓清江境將此由六百里各
諭令知之○諭見在蔡啟等逆在陝西盤屋一帶滋擾雖經劉蓉
等督兵剿辦而賊勢未衰四川邊界多與陝西毗連設該逆被擊

窮蹙乘閒窺川不可不豫爲防範昨據曾國藩馳奏金陵克復全股悍賊殲除而湖北麻黃一帶賊尙充斥該逆等聲稱欲救金陵故銳意東竄此時金陵巢穴既覆此股賊匪聞風喪膽未必仍敢東趨僧格林沁已移紮光州官文亦進至黃州合力進剿賊見我軍勢大必將折而西奔恐其逼近川疆冀圖竄逸均不可以不防著駱秉章嚴飭沿邊防軍勤加偵探嚴密守禦毋令一賊得以闖入以期盡埽妖氛將此由六百里諭令知之○廣湖南湘鄉縣學額六名攸安化清泉衡山耒陽新甯各三名茶陵衡陽甯遠桃源各二名安仁常甯邵零陵祁陽道武陵龍陽永順芷江郴永興桂東澧各一名○庚子諭內閣朕以冲齡踐阼荷蒙兩宮 皇太后垂慈特命祁寯藻倭仁李鴻藻在弘德殿授讀並派倭什琿布伊精阿授讀清文祁寯藻等均能朝夕納誨講貫發明朕於典學之

餘深資啟沃茲當巨寇蕩平江南底定祁寯藻等輔弼朕躬同深慶幸允宜共沐恩施祁寯藻倭仁倭什琿布伊精阿李鴻藻均著賞紀錄二次○諭恭親王自簡授議政王以來於今三載適值東南等省兵事方殷用人行政徵兵籌餉一切深資贊畫弼亮宣猷忠勤丕著軍機大臣文祥等翼贊樞廷同心輔治前於蘇杭省城克復各案內屢欲降旨加恩均經該王大臣等再三懇辭不忍重違其意茲當江甯省城克復紅旗馳報殲擒首逆本欲援照從前優獎成案降旨施恩乃該王大臣等仍復懇切力辭鑒其誠悃不得已酌中給予恩施以獎勞勩議政恭親王著加恩賞加軍功三級仍加賞一員勒令伊子奉恩輔國公載澂受封並封伊子載濬入八分輔國公載瀜不入八分鎮國公軍機大臣工部尚書文祥著賞加太子太保銜伊姪凱肇並賞給員外郎分部學習行走戶

部尙書寶璽著賞加太子少保銜並賞戴花翎工部尙書李棠階
著賞加太子少保銜伊子李淳並賞給舉人准其一體會試兵部
左侍郎曹毓瑛著賞加頭品頂帶賞戴花翎以示朕慶賞庸庸之
意此次辦理軍務十有餘年軍報絡繹事務殷繁軍機章京等昕
夕從公承書諭旨均無貽誤尙屬著有微勞著議政王軍機大臣
分別等第酌量從優保獎候旨施恩○諭昨因江甯紅旗報捷省
城克復全股悍逆悉數殲除業將在事出力諸臣酬庸錫爵分別
加恩因思諸王貝勒等分屬宗親誼關休戚允宜同被恩綸用昭
篤眷除恭親王業經加恩外惠親王之子奉恩輔國公奕詳著晉
封奉恩鎮國公不入八分鎮國公奕詢奕謨均著賞戴三眼花翎
惇親王之子鎮國將軍載濂著晉封不入八分鎮國公載津著賞
給頭品頂帶醇郡王著賞給親王銜鍾郡王著賞給紀錄四次管

理武英殿事務孚郡王著賞給紀錄四次管理樂部事務郡王銜載治貝勒載漪均著賞給紀錄三次定郡王溥煦郡王銜貝勒溥莊貝勒奕劻禮親王世鐸睿親王仁壽豫親王義道肅親王華豐莊親王奕仁克勤郡王晉祺順承郡王慶恩均著賞給紀錄二次御前大臣內廷翊衛克勤厥職亦應一體恩賚除醇郡王及僧格林沁已分別加恩外景壽著賞還紫韁奕山著晉封一等鎮國將軍德木楚克扎布前經告假見在雖未在京亦應一體加恩著賞給紀錄四次以示嘉賞成功覃敷閭澤至意○諭總管內務府大臣等平日在內廷行走經理一切事務夙夜在公勤慎妥協茲當江南底定嘉報邇來同深慶幸除恭親王寶鋆文祥業經加恩外綿森存誠明善均著賞給紀錄一次○諭前因江甯克復巨勲就殲疊經降旨將中外宣力王大臣等酬恩懋賞因思軍興以來凡

屬臣工無不志深敵愾同企捷音允宜普沛恩施以昭優賚所有
中外大小臣工均著賞加一級用示閭惠覃敷至意○諭昨因克
復江甯紅旗報捷効力行閒諸臣業已特加恩賞並頒去獎武銀
牌四百面分賞將士以資有功惟念江南用兵已十餘年所有各
營兵勇衝鋒陷陣奮勇前驅晝夜荷戈備極勞瘁近日江甯之役
復能於炎暑烈日之中誓死殺賊踊躍用命以竟全功一切在防
兵勇或分路馳援或嚴防要隘齊心勦力敵愾同仇念其從征之
苦惻然興懷允宜普被恩施用昭體恤著江南各路統兵大臣暨
各該督撫等查明各營弁兵勇丁實在出力者除擇尤保獎外餘
著分別犒賞以示朝廷沛澤戎行有加無已至意○諭蒙古三盟
馬隊官兵自隨僧格林沁剿賊以來頻年征戰所向有功上年肅
清直隸山東全境削平張落刑苗沛霖等巨逆該蒙古馬隊甚爲

出力本年復埽清豫省進紮皖鄂之交遏賊東竄該官兵等從征多年立功數省嚴寒酷暑備極辛勞而該大臣向來於蒙古官兵內保舉出力將士人數尤屬無多從不肯稍有冒濫見當江甯克復行閒士卒均荷恩施該蒙古官兵際此溽暑炎蒸荷戈力戰允宜優加獎賚普沛恩綸所有僧格林沁軍營統帶蒙古馬隊各員著該大臣擇其出力者查明酌量保奏候旨加恩其該營蒙古兵丁加恩並賞銀一萬兩由該大臣糧臺給發以示體恤至吉林黑龍江官兵歷年征戰亦屬著有微勞並著由該大臣隨時酌量獎勵以昭激勸俟全功告成定當同加優賚也○諭昨據官文曾國藩等奏到克復江甯省城元兇授首全股殄除溥海臣民同深歡慶因念八旗兵丁生計未裕早欲加恩賞賚緣年來軍務未竣支用較繁是以未經降旨今當江南底定捷報馳聞允宜特沛恩施

傳霑惠闔所有八旗兵丁著戶部照見放章程加恩賞給一月錢糧用示體恤旗營至意○諭惠親王奏假期將滿病仍未痊請開缺停俸一摺本年自三月初閒疊據惠親王因病請假屢經溫諭給假安心調理茲屆假期將滿據稱骸病尙未就痊殊深厯繫惠親王係朕叔祖輩分最尊見以身體違和請開各項差使自應勉如所請以節勞勩而示優崇惠親王所管各項差使均照所請開缺並加恩毋庸停俸仍在內廷並弘德殿行走俟珍攝如恆自行酌量進內照料毋庸拘定日期惠親王之子奕詳奕詢毋庸在弘德殿伴讀以便左右侍奉朝夕承歡王其安心頤養調理順時庶微疾速痊長承優眷也○諭議政王軍機大臣等蒙古三盟馬隊官兵自隨僧格林沁剿賊以來頻年征戰所向有功見在進紮皖豫之交嚴扼髮逆東竄時當夏令冒暑遄征軫念行閒倍深厯繫

本日以江甯克復已將該處兵弁諭令曾國藩等酌加獎賚外茲復明降諭旨將僧格林沁軍營統帶蒙古馬隊各員著該大臣酌量保奏其該營蒙古兵丁並加恩賞銀一萬兩著發去明發諭旨一道該大臣於接奉後卽行繙譯蒙古文宣示該營將士以示朝廷垂念辛勤優加獎賚之意將此諭令知之○諭都興阿奏力籌進剿先援甯夏已革總兵定安捏造欽奉事件慶昫奏郡城近日情形各摺片逆匪攻撲平羅縣城決渠淹灌勢甚猖獗該縣爲產穀之區儻爲賊踞不惟滿城孤立且採辦兵糧備形棘手亟應籌撥勁旅速解城圍著都興阿督飭杜嘎爾帶領派出各軍由石嘴山渡河繞赴甯夏北山星速前進痛加剿洗援救危城如所調各營陸續到防仍著都興阿分兵進剿靈州以期節節掃蕩都興阿見在花馬池購買黃米五千餘石並飭延安各屬查明倉穀酌量

動碾借用駝隻運解米糧鍋帳卽著照所擬文籌辦理並知照準
噶爾貝子扎那濟哩第飭令邊外沿途豫挑開泉備辦柴薪以濟
軍行定安以馬化澁在金積堡招集死黨意圖水陸分竄中衛勢
單請兵援剿並請調營差委是否該革員畏思無能取巧規避卽
著都興阿確查參辦該革員所稱於中衛差次經熙麟奏畱已邀
允准一節著都興阿將定安交出摺稿諭旨鈔錄進呈一面詳細
查明據實具奏慶昫奏漢城回匪逐戶搶掠商民失業人心離散
賊匪中之強者所搶較多弱者所搶較少是以貧回既無所得轉
致廢時失業賊首馬萬選赫文典亦因分贓不勻貌合心離該匪
互相猜忌眾志渙散當此機有可乘如能合兵進擣定當事半功
倍著都興阿雷正綰將如何派撥勁兵進剿甯夏漢城以赴事機
之處悉心籌商妥爲辦理慶昫常陞就見有一兵力嚴密堵剿毋徒

株守待援致失戎機見在金陵全城克復殲擒首逆我軍聲勢日壯都興阿等乘此聲威務當大張撻伐如其畏威悔罪捆獻逆首亦可酌度機宜量從寬政總期肅清甘省早紓厘繫以副委任勉之慎之將此由六百里各諭令知之○辛丑諭內閣我國家重熙累洽二百餘年世際承平丕基永奠從前康熙二十三年 聖祖仁皇帝以歲逢甲子 渥沛恩綸停止秋審逮乾隆九年甲子再周嘉慶元年甲子三周 皇高祖高宗純皇帝 皇曾祖仁宗睿皇帝式循 前典 闔澤覃敷均奉 特旨將是年情實人犯停止句決茲又屆甲子紀年朕紹承 洪緒寰寓同懽允宜恪遵成憲省歲恤刑所有本年朝審各省情實人犯著加恩停其句決一切條款著該部查議具奏○諭昨因江甯省城克復首逆就殲業經先後降旨將在事出力各員及內廷諸王大臣等優加獎勵

惟念此股逆匪起自廣西其始不過游民相聚勾結煽惑地方官
辦理不善貽患養癰致十數省億萬生民慘罹鋒鏑興言及此疾
首痛心見在逆首已就殄除東南漸期底定仰賴 昊蒼默佑

宗 祖垂慈實感之餘倍深祇懼允宜朝夕乾惕以答 天庥自
古君臣安不忘危治不忘亂卽令今日已治已安猶當戒慎恐懼
不自滿假何況浙江安徽尙有賊蹤湖北江西逆燄方熾滇黔陝
甘等處回匪教匪勾結仍多雖金陵之根株旣拔餘賊不難迎刃
而解而稍涉大意卽恐難迅速廓清各該處統兵大臣督撫等務
須激勵將士奮勉圖功以期普奏凱歌使吾民出水火而登衽席
見在江南等省新復地方閭閻彫敝創鉅痛深老弱轉徙流離尙
未復業應如何招徠撫恤遂民生而蘇民困之處著該督撫詳加
籌畫慎選守令實心實力辦理其見無軍務省分亦應講求吏治

破除積習以期久遠又安著各直省督撫再行認真整頓於州縣中實心愛民講求治理者隨時奏請獎勵不職者立即參劾並將安插降眾安撫難民各事宜妥爲明定章程期於辦理盡善其內外大小臣工各宜兢惕爲懷勤思職業不得以捷書過至謂海內業已承平因而晏安爲懷遂致廢弛公事總期上下交儆共濟時艱慎始圖終無荒無怠以鞏丕基而躋上治有厚望焉將此通諭知之○諭見在江甯克復巨逆伏誅中外出力臣工疊經降旨分別獎敘因思戶部兵部堂官或籌備軍需餉項或督辦驛傳事宜均臻妥協允宜同沛恩施除戶部尙書寶鋆兵部左侍郎曹毓瑛右侍郎彭玉麟業經加恩兵部左侍郎崇厚未經到任毋庸甄敘外所有戶兵二部堂官均著交部議敘並著該堂官等將該部出力司員擇尤保獎毋得冒濫○諭議政王軍機大臣等軍興以來

各路軍營由兵勇出身打仗得力者歷保參副等官續有勞績無可再加往往奏請以提督總兵記名簡放朝廷破格用人每逢各路統帥疆臣奏保無不立沛恩施惟提鎮係專闡大員爲通省各營之表率關繫極爲緊要常有戰勝攻取極爲得力而於平日一切操防各事宜閱歷太淺訓練未免失宜迨至驕縱廢弛貽誤戎機被人參劾朝廷加以嚴譴致有用之材不獲養成大器以備干城之選殊爲可惜嗣後各省督撫各路統兵大臣凡保舉記名提督總兵者須另片密註堪以勝任字樣或其人材堪造就而於提鎮大員尙難稱職不妨給予別項優獎俟其歷練較深再畀以專閫重任如有實在不能勝任者亦卽隨時奏參不得稍有遷就以仰副整軍經武培植將材至意將此各諭令知之○諭官文奏髮捻屬聚麻城白杲官軍小挫後勝黃麻投誠賊目立功贖罪一摺

逆匪盡驅白杲麻城閔家集各路之賊猛撲官軍營壘分股包鈔
六合集周鳳山前軍小挫各情與僧格林沁前奏大略相同周鳳
山此次進剿失利雖因眾寡不敵究屬布置失宜著卽拔去花翎
以示薄懲麻城之賊由新洲辛家沖擾及岐亭宋埠該處爲各軍
後路最關緊要官文見調趙克彰三營並毅桓等三營扼紮岐亭
宋埠飭藍斯明由水陸前進催姜玉順蕭河清由水陸分道徑赴
麻城分軍由江面赴蘄州迎剿著官文卽飭派出各軍協力進剿
殄除羣醜以效聚殲之效蘇克金軍已抵麻城之黃土岡因山路
崎嶇馬隊難於施展見由北面伍家河閭家河進逼英山折回之
賊大股屯踞麻城勢將回竄黃孝等處均形喫重著僧格林沁嚴
檄蘇克金等會合楚軍實力掃蕩毋令該逆再由舊路西竄復肆
蔓延金陵攻拔該逆既不敢東趨皖境若再不得逞志於楚必併

竄豫疆光羅一帶尤形危緊著張之萬督飭將弁嚴密堵禦不得因僧格林沁大軍在境防剿專恃客兵轉得置身事外若令該匪闖入豫境又成燎原之勢必惟張之萬是問賊目黃桂元等赴富森保等營投誠降日高郭寶等率長髮老賊三百餘人赴麻城東門乞降官文飭令立功贖罪著照所擬辦理惟逆匪類多叵測其悔罪輸誠自拔來歸者固不乏人而意存反覆往往首鼠兩端亦不可不豫爲之防官文當飭屬妥爲辦理毋得稍涉大意致墮詭謀將此由六百里各諭令知之○諭前據步軍統領衙門奏湖南已革巡檢李際晟呈控知府李逢春等挾嫌參革等款當經諭令官文密查覆奏嗣據官文奏請將李逢春革職押赴湖北歸案質訊亦經諭令劉長佑遵辦茲據官文奏李際晟已提到鄂省飭司先訊大概供詞詎該革員任意刁狡形同訟棍牽涉多端萬難理

諭所控李逢春挾嫌受賄捏飾驛站等款仍當詳細查明折服其
心至毛鴻賓納妾一節請令該督自行回奏再所控私提庫銀行
賄載垣等一款並無可憑請予免究等語參員挾嫌京控上官照
例原係立案不行以戢刁健惟李際晟所控毛鴻賓受妾行賄等
款牽涉疆臣案情較重如不切實查辦徹底研結遽行概予免究
致妄控者有所藉口轉無以折服其心著官文仍遵前旨迅卽咨
提李逢春到鄂按照李際晟所控各情逐一秉公研訊務期水落
石出以成信讞毋庸稍涉迴護所控湖南省劣員倚勢作威賁緣
要結等情並著官文咨明惲世臨會同甄覈悉心考察毋稍徇隱
餘著照所議辦理另片奏記名總兵王萬年等不勝專閫之任等
語覽奏已悉並諭知劉蓉察看余福象能否勝任覈奏辦理矣原
片著畱中將此諭令知之○諭麟興等奏遵旨約束所部人眾並

請飭庫倫速繪舊圖咨送伊犁覈封一摺前據明誼等奏接准科布多烏里雅蘇台咨文卡內蒙古游牧見均設法安置茲據麟興等奏稱據唐努烏梁海總管等呈到遵繪各旗游牧圖誌東自固爾彌達巴哈起西至沙彌柰達巴哈界牌止卽係唐努烏梁海游牧麟興等因烏里雅蘇台並無存有確切舊案當卽咨查庫倫隨准照鈔雍正五年兩國所換原約劃分界牌地名覈與委員所查大略相同似例載沙彌柰嶺卽是唐努烏梁海游牧內之沙賓達巴哈已無疑義而俄國送來議單內載唐努鄂拉達巴哈疊次覈對均無此前項地名如果卽指唐努山不特與雍正年間定界舊案不符且與十年新定條約所載地址亦屬相背請飭庫倫將交界原圖咨送明誼等以憑覈對等語俄人所稱唐努鄂拉達巴哈旣查無此地名非調取從前定界圖誌以備俄使前來持與會議

不足折服其心庫倫自必存有舊圖著文盛等速將已定交界圖誌照繪一分或將原圖徑行咨送明誼等以備與俄使會議時詳明質證是爲至要將此各諭令知之○麟興等奏科布多所屬之霍呢邁拉扈卡倫忽有俄國六十餘人前來駐紮聲言照料游牧又由該國雅什達喇城衙門送來俄文內稱阿勒坦淖爾等處均係該國游牧綽羅什拜地方復有俄人數名伐木聲稱該處係俄國富人前來貿易並有該國大喇嘛人前來蓋廟居住奏入諭常清明誼等派員開導○壬寅諭內閣御史景星等奏宗室覺羅潛往外城請飭查禁一摺據稱近來南城地面頗有宗室覺羅隱匿姓名居住者行蹤詭祕不安本分及與民人口角爭訟始將眞姓名說出以圖挾制司坊官傳訊永不到案請飭查禁等語外城地面向不准旗人居住至宗室覺羅更不應在外城溷迹若如該御

史所奏詭託姓名與匪人爲伍滋生事端情尤可惡著宗人府八旗嚴行飭禁宗室覺羅人等概不准移居外城如有先經移居者卽著查明勒限遷回內城居住毋任延玩經此次飭禁之後儻再有潛居外城怙惡不悛者卽著該城御史等訪查確實奏明究辦○諭議政王軍機大臣等穆圖善劉蓉奏逼剿蔡逆獲勝見籌添兵會剿並曹克忠一軍西路截剿獲勝各摺片蔡逆被官軍擊敗後過田峪河移踞焦家巷等處經穆圖善等與曹克忠所部各軍分路截剿連日屢有斬擒該逆勢漸窮蹙與啟鄭諸逆合併抗拒穆圖善等見紮田峪河東岸並函商曹克忠逼紮田峪河西擬爲兩路夾擊一鼓聚殲之計惟賊勢尙眾官軍兵力較單穆圖善等所調蕭慶高一軍由洋縣取道佛坪會剿卽著催令迅速前進合力兜擊並著李雲麟迅率所部分駐華陽江口四畝地各隘以杜

紛竄蔡逆率賊黨五六百人在黑峪河東岸經曹克忠督隊迎擊將蔡逆閃落馬下爲賊眾擁救逃逸據生擒賊供該逆因官軍緊逼意圖偷渡渭河竄往岐鳳一路余福象所部兵力較薄卽著劉蓉等咨商雷正綰陶茂林將曹克忠所部隴防四營星速調紮鳳翔如賊匪乘閒偷渡渭河卽行攔頭截擊並嚴飭余福象就見有防兵探蹤堵截毋稍疏懈蔡逆勢窮思竄正當合力協剿將全股就地殲除著劉蓉李雲麟等嚴督諸軍與曹克忠一軍併力環攻悉數殄除以靖疆圉儻任令擾及他處致褻脅日眾逆燄復張必惟劉蓉李雲麟等是問降將葉毓廣隨同曹克忠剿賊立功自應量予獎敘劉蓉等請賞給該降目四品翎頂或以都司補用未免過優著改爲賞給六品翎頂嗣後葉毓廣續有勞績仍可從優保獎也漢中地方彫敝旣據劉蓉奏稱前署守楊光澍於撫綏地方

及籌辦善後各事宜頗著成效著照所請改爲革職畱任仍令署理漢中府知府劉蓉卽飭令該員將地方應辦事宜認真經理使地方日有起色本日據官文奏陝西漢中鎮總兵余福象見年二十二歲於營務毫無歷練而奢華浮動性情未定似未便遽膺專閫請飭查看等語並著劉蓉隨時認真查看能否勝任據實具奏將此由六百里各諭令知之○癸卯追予故漕運總督袁甲三在江蘇淮安府城建祠○甲辰諭內閣議政恭親王奏敬陳感悚下忱請停親王雙俸一摺咸豐十一年冬閒朕奉 慈安皇太后慈禧皇太后自熱河旋蹕授恭親王爲議政王並以王自畱京辦事以來諸臻妥協因仰體 皇考文宗顯皇帝酬庸未竟之志宣示 遺命以親王世襲罔替王涕泣固辭不得已降旨從緩俟朕親政之年再行辦理先行賞食親王雙俸以示優禮昨因江甯逆

首就殲紅旗告捷我兩宮 皇太后以王首贊樞廷賢親最著亟
思丕承 先緒仍加恩以親王世襲罔替王乃推功諸將再三懇
辭念其情詞諄切俯如所請僅加恩王之三子載澂等於朝廷論
功行賞之心初未盡愜茲復據奏金陵雖克而湖北江西賊氛尙
熾陝甘雲貴餘孽未平軍餉浩繁庫款支絀且在京王公諸臣之
俸糈八旗兵丁之月餉減成支放未復舊章而王公貝勒萃於一
門既忝高爵復膺厚祿若不痛自抑損不獨滿則必虧徒增咎戾
且何以副知遇之隆而塞天下之望請將支食親王雙俸之處即
行停止等語覽王所奏具見忠愛惻怛出於至誠惟爵以馭貴祿
以馭富國家詔精之典古今所同王自簡任樞廷於今三載運籌
決策成效卓然嗣後慎始敬終忠勤匪懈行當廓清區宇丕著全
功拭目昇平更加懋賞至此嘉賞成功因王摺抑爲懷僅酌中

給予恩施未嘗加厚若將從前所降恩命遽爾收回亦恐無以昭勸賞之平而示人臣之則恭親王仍著食親王雙俸其母固辭○諭前因僧格林沁奏遵查苗逆仇殺徐立壯等案並呈遞黃鳴鐸等稟詞當經諭令兵部傳知翁同書聲覆並交曾國藩喬松年詳查具奏嗣據喬松年於馳抵臨淮附陳大概復經諭令俟會同曾國藩奏到再降諭旨茲據曾國藩喬松年奏稱遵查孫家泰力拒苗逆仰藥自盡蒙時中慷慨赴難突遭慘害與黃鳴鐸等稟詞均相照合惟徐立壯被殺情形傳聞異詞出入甚重徐立壯本苗逆部下隊長後因積不相能自願助守壽州以拒苗逆而所募勇丁入城肆行剽掠徐立壯明知故縱又招著名捻首葛小牛竄掠壽城該州人民公議請於翁同書令其移營城外徐立壯以違令被誅罪由自取其家屬之死係爲苗逆所殺與辦團無涉可毋庸議

博崇武署壽春鎮總兵於苗逆構亂一意主撫自知眾志不孚與慶瑞尹善廷突圍南去避匿不出坐視苗逆攻城並未堵禦雖查無與苗逆合隊確據而迎合苗逆頓兵不出實屬共見共聞張學醇奉袁甲三檄提孫家泰蒙時中解赴臨淮墮苗逆詭謀一籌莫展卒至壽州城陷孫家泰等之死雖非張學醇設計逼脅而追原禍始辦理錯誤實無可辭鄒學鏞擬就摺彙逼令翁同書出奏一節查無實據惟隨同附苗款接獻勤實屬昏憤無恥請將博崇武等分別罪名擬結並孫家泰優卹建祠等語此案前署壽春鎮總兵記名副都統博崇武以專閫大員迎合苗逆頓兵縱寇所犯情節較重著卽行革職發往新疆充當苦差永遠不准援減總兵慶瑞尹善廷隨同博崇武避匿坐視城陷實屬畏葸無能均著卽行革職發往新疆效力贖罪壽春營遊擊鄒學鏞聽從博崇武等指

揮獻媚苗逆實屬卑鄙可惡著卽行革職永不敘用前任臬司張學醇身任監司毫無識見甘爲苗逆所給致壽城被陷顛倒荒謬貽害地方該員前經袁甲三奏參革職嗣以軍前立功復經奏請獎勵著將前次請獎之案卽行撤銷仍發往軍臺效力贖罪前任漕運總督袁甲三於苗逆攻逼壽州時派張學醇查提孫家泰等解赴臨淮原係權宜辦理冀消反側惟於張學醇等之辦理不善致墮狡謀未能先行覺察亦有應得之咎所有前次降旨准將該故漕督在臨淮建祠之處著卽撤銷其辦團各員除徐立壯罪有應得毋庸議卹外已革刑部員外郎孫家泰力拒苗逆疾惡若仇候選從九品蒙時中挺身就義甘蹈湯火均屬義勇可嘉孫家泰著開復原官追贈四品卿銜照陣亡例從優議卹蒙時中著追贈通判銜照陣亡例從優議卹孫家泰之父五品封職鹽大使孫贈

祖於壽州城破被執罵賊陣亡及國子監典簿孫家德追賊救父
力竭被害甘肅候補府經歷孫家彥候選訓導孫家洪候選鹽大
使孫傳洙候選從九品孫傳熙在籍辦團均被戕害一門忠節洵
堪嘉憫著交部各照本職從優議卹卽在壽州地方建祠並准將
蒙時中附祀以慰忠魂其餘殉難官紳人等著會國藩等續行查
明分別請卹○諭議政王軍機大臣等喬松年奏接奉疊次諭旨
並陳近日軍情一摺據稱賊匪盤踞羅田積穀擄人以爲久住之
計餘賊仍在麻城市聚是賊踞羅田爲巢穴必將逐漸進步與尋
常之飄忽亂竄者不同蓄謀甚狡亟應乘其盤踞未固大張撻伐
前據僧格林沁奏駐紮光州之長嶺集居中調度軍情變幻靡常
刻下應由何路督率諸軍合力兜剿並聯絡楚師夾擊之處著該
大臣相機辦理務將賊氛迅速殄滅陳國瑞一軍蓄銳已久或令

從商城進剿麻城攔腰橫截或令由英山進剿羅田迎頭兜擊著僧格林沁妥籌調度檄令速進正陽關地當扼要著喬松年懷遵前旨親往移紮一切攻剿機宜隨時稟商僧格林沁協力進取壽州地方派定何員駐守並著奏聞將此由六百里各諭令知之○諭毛鴻賓奏剿客匪連破匪巢並張運蘭所部勇丁潛逃回籍各摺片陽春客匪自竄入新興後卓興等軍聯營進剿將古院回龍等處大小匪巢八十餘座盡行攻破斃匪千餘人餘匪向高明縣屬之五阮逃竄此次出力員弁兵勇著准毛鴻賓擇尤彙案保獎毋許冒濫客匪挾仇相殺兵連禍結積十數年勢難一概誅戮且其攫食求生情殊可憫亦與甘心叛逆者有閒辦理之法總當剿撫兼施脅從罔治方有了期該匪等見經此次痛剿逃竄五阮而五阮客民復與高明土民相持未下勢將聯爲一氣固結不解開

平恩平鶴山等縣處處均虞竄突毛鴻賓郭嵩燾惟當乘此軍威
丕振該匪膽寒之時妥爲開導飭令將賊首戴梓潰速行交出其
餘脅從即可分別良秀網開一面以期早就廓清一面嚴飭卓興
等軍妥爲布置毋任四處蔓延重煩兵力土客皆朝廷赤子若使
窮蹙鋌走雖多行殺戮殊失朝廷勦辦之意毛鴻賓郭嵩燾諒能
洞悉辦理也張運蘭起程赴閩該營弁勇竟敢藉欠餉爲名私行
逃去至千餘名之多實屬目無法紀所有湖南補用遊擊蕭洪任
程德亮都司辛萬春唐春山守備言作朋均著拔去花翎都司賀
夏生守備鄒甫田鄒洪亮官正清陽光武陳有才馮定發千總蕭
復泰李光明易明德郭泰山李玉華把總朱長松均著拔去藍翎
把總顏桂山一併革職卽由毛鴻賓咨行惲世臨嚴密查拏務獲
究辦以示懲儆閩省防剿至關緊要並著毛鴻賓等檄飭張運蘭

卽帶舊部二千人迅由信豐長甯取道先行赴閩其道員張恆祥等所募桂東之勇並催令趕緊成軍陸續前進毋稍宕延將此由五百里諭令知之○諭張凱嵩奏匪撲泗城府城經勇練擊退奸民勾結土匪襲陷歸順州城各一摺匪徒廖萬服楊通潮等由滇黔邊境竄入西林凌雲突撲泗城郡城知府吳其達督率勇練擊斃該逆退至距城一百六十里之甘村旋竄出鳳凰山邏耶等處我軍斃匪無算追至右里安凝一帶該逆勢將回黔若非合力兜剿勢必於兩省邊界狼奔豕突肆意蹂躪漸至不可收拾著勞崇光張亮基張凱嵩嚴檄派出官兵團勇併力進攻兩面夾擊以期聚而殲旃匪首廖萬服是否業已殲斃楊通潮見逸何處著張凱嵩查明具奏投誠之張世榮雖經助剿獲勝是否始終可與張凱嵩務當嚴密防範不可稍涉大意勞崇光張亮基當激勵將弁越

境追躡不得專防黔省本境徒事株守土匪小張三竄擾天保縣之淶坡等處另股陸侍汰由天保圖撲歸順已革團總鍾啟藩詭稱係奉調鄉團潛抵城下奸民遽開東門放賊竄入歸順縣城被陷署天保縣知縣瑞齡等先後中槍倒地是否業已殉難及其餘文武下落著張凱嵩查明具奏惟天保歸順被匪竄擾係上年八月至十一月之事該處雖距省寫遠亦何至遲至本年六月始行入奏辦賊之道偵探最爲緊要遲鈍顛預至於此極尙望其運籌決勝神速用兵耶泗城歸順之賊見在均藉團勇堵禦恐聲勢較弱一時驟難得手該省潯州等屬先後肅清正可騰出兵力前往剿辦著張凱嵩抽撥勁旅星速前赴泗城歸順等城實力進剿殲除醜類克復城池以期廓清疆圉將此由六百里各諭令知之○丙午諭議政王軍機大臣等李雲麟奏楚軍借款急難歸還見擬

遣回湖北再行變通辦理一摺據稱援陝後添立隴軍水陸各營餉無所出不得已借用楚餉二萬五千餘兩並因所部義勝三旗豫東協餉屢催不解復將毅健一軍解到餉銀通融墊發總計墊發過義勝軍餉銀一萬一千餘兩合之隴軍各營實借用過楚餉三萬六千餘兩本擬俟陝南肅清籌款補還不意陝南甫清而陝北喫緊省局不能兼顧不但前借楚軍之餉不能籌還且並無糧米餉口楚軍眾議紛紛久恐生變擬於數日內先將楚軍六營交遊擊金殿安楊桂芳等分統回楚此項借款暫由官文設法彌補俟陝省肅清或豫東欠餉解到卽行陸續解還楚省等語毅健六營本係湖北撥援陝省之兵李雲麟見因餉項支絀恐致譁潰先行撤回楚省自係迫於萬難之勢卽著李雲麟嚴飭金殿安等妥爲管帶赴鄂毋令沿途滋事此軍到後著官文酌量調遣至借用

該軍餉項既據李雲麟奏稱無款籌還亦係實在情形卽著官文
先行設法將前項借用銀三萬六千餘兩籌款分給以贍飢軍李
雲麟亦當迅速籌措解還鄂省至所畱隴軍各營仍著李雲麟妥
爲駕馭一切糧餉軍火就近咨商劉蓉隨時接濟以振士氣而靖
賊氛將此由五百里各諭令知之○戊申諭內閣戶部奏請將軍
需報銷變通辦理一摺據稱軍需報銷向來必以例爲斷然其間
制變因時亦有未能悉遵之處各省軍需歷年已久承辦既非一
人轉戰動經數省則例所載徵調但指兵丁而此次成功半資勇
力兵與勇本不相同例與案遂致歧出在部臣引例覈案往返駁
查不過求其造報如例而各處書吏藉此需索棉臺屬員借以招
搖費無所出則浮銷苛斂等弊由此而起請將同治三年以前未
經報銷各案開具簡明清單奏明存案並請飭禁勸捐歸補名目

等語所奏係爲因時杜弊起見軍需報銷一事本有例定章程惟近來用兵十餘年蔓延十數省款目所在多有若責令照例辦理不獨虛糜帑項徒爲委員書吏開需索之門而且支應稍有不符於例卽難覈准不得不著落賠償將帥宣力行閒甫邀恩錫旋迫追呼甚非國家厚待勳臣之意著照該部所請所有同治三年六月以前各處辦理軍務未經報銷之案准將收支款目總數分年分起開具簡明清單奏明存案免其造冊報銷此係朝廷破格施恩各路統兵大臣各省督撫具有天良務須督飭糧臺委員覈實開報不得因有此旨任意影射浮冒並著嚴禁勸捐歸補名目及私設釐卡等弊如有不肖委員仍以前項情弊巧爲嘗試別經發覺除將承辦各員嚴辦外必將各該統兵大臣及各省督撫等從重治罪部中書吏如有在各處招搖撞騙蒙混包攬者並著嚴行

拏辦以懲奸蠹其自本年七月起一應軍需凡有例可循者務當遵例支發力求撙節其例所不及有應酌量變通者亦須先行奏咨備案事竣之日一體造冊報銷不得以此次特恩妄生希冀將此通諭知之○已酉諭內閣江甯前明太祖陵寢本朝每歲春秋致祭並於江甯地方官內專委一人修理傾圯設有陵戶加意防護所有敬禮前代者極爲優渥咸豐三年賊匪竄陷江甯曾據向榮奏稱明陵享殿被焚前因逆燄鴟張未獲以時展祀緬懷前朝陵廟良用惻然見在紅旗奏捷攻拔名城地方已臻底定而兵燹之餘廟貌傾壞若非重加繕治殊不足以肅禋祀而昭優禮著派曾國荃前往明太祖孝陵致祭其有應行修葺之處著曾國藩一面查明情形迅速奏聞一面督飭地方官酌量興修務令完固整齊用副隆禮勝朝有加無已至意○諭議政王軍機大臣等楊岳

斌奏出省督勦並親赴各路察省形勢調回水師五營分布贛河
一摺崇仁之賊圖犯吉臨等郡楊岳斌擬由豐城馳赴崇仁督勦
著卽會商劉典督同江忠朝等軍力圍掃蕩並令鮑超等將許灣
東鄉各踞賊分投勦洗毋任旁竄賊眾我寡宜黃南豐金谿兵力
尙難徧及該督已調回水師五營如陸軍單薄亦可咨商曾國藩
等將金陵陸師酌量調派以厚兵力省城防務沈葆楨督率萬泰
等認真巡防務須周密喬松年奏陳國瑞已赴麻城英翰馳赴商
城麻城賊勢固重羅田之賊亦圖久踞終有竄擾英霍之虞該撫
見擬先赴壽州卽赴正陽關察度情形權其緩急期於兼顧無失
所籌尙妥著於到壽布置後仍遵前旨馳赴正陽關妥籌防勦朱
淮森四營卽可令全駐壽州以備緩急調用圖一件畱覽另片奏
羅田之賊恐竄英山請調金陵勁旅從英山進勦等語金陵得勝

之師休息已半月有餘著曾國藩卽調派得力將弁帶勁兵萬人從英山一路前進與楚師會合夾擊該撫片內所稱曾國藩不日仍回安慶已與函商辦理等情江甯地屬首要見在甫經克復一切撫綏安輯應行辦理之事甚多曾國藩如不能再赴安慶卽著派彭玉麟曾國荃等酌量帶兵分駐上游以資控扼其皖南之廣德等處恐湖州賊匪續犯江西並著分派勁兵迅圖克復廣德勿任紛竄昨據御史陳廷經條陳善後事宜一摺內有疆輿略爲變通一條請以徽州甯國池州太平四府割屬江蘇與江甯蘇州松江常州鎮江爲一省以揚州淮安徐州海州通州割屬安徽與安慶廬鳳潁泗爲一省江南江北分設科場各等情與地方吏治有無裨益著曾國藩李鴻章喬松年酌度形勢妥籌具奏其安置勇丁一條疊經降旨令該督撫等豫籌善策如何酌量挑補兵額造

散歸農之處並著該撫等妥慎辦理毋貽後日無窮之患又據御史賈鐸奏請飭曾國藩等勉益加勉力圖久大之規並粵逆所掠金銀悉運金陵請令查明報部備撥各等語曾國藩以儒臣從戎歷年最久戰功最多自能慎終如始永保勳名惟所部諸將自曾國荃以下均應由該大臣隨時申儆勿使驕勝而驕庶可長承恩眷至國家命將出師拯民水火豈爲征利之圖惟用兵日久帑項早虛兵民交困若如該御史所奏金陵積有鉅款自係各省脂膏仍以濟各路兵餉賑濟之用於國於民均有裨益此事如果屬實諒曾國藩亦必早有布置惟該御史既有此奏不得不令該大臣知悉曾國藩由安慶到江甯於調兵安民整飭地方各事宜諒已有奏報在途江甯城內情形若何居人能否漸次復業實深厯繫貢院有無損壞應如何修葺之處著曾國藩查明具奏聞江北釐

卡畝捐戶捐及一切各捐均仍照前疊經降旨裁革未據地方官認真辦理亟應釐剔弊端與民休息著曾國藩吳棠李鴻章嚴行禁革如有委員劣紳藉端苛斂卽行拏辦以儆其餘兩淮鹽務爲庫款大宗曾國藩早經派員興辦此時江路通暢可以圖復舊觀著飭運司招商認運以期國課漸充並著飭令藩運司等官各歸舊駐地方不得仍前駐紮泰州一隅圖旦夕晏安之便致與大局無益江防師船已由富明阿次第裁撤回粵浙江之賊不能越蘇常而至鎮江楚北之賊不能越英霍而至天六江西之賊不能越九江而至安慶此外並無可防之賊是揚防各軍見屬無事著富明阿酌量裁撤調撥以節糜費楚北麻城等處之賊剿辦若何如須增兵助剿爲一勞永逸之計卽著僧格林沁官文飛咨曾國藩將金陵得勝之軍酌量調撥以期早日肅清近日軍情賊勢並著

趕緊奏報以紓朝廷南顧之憂將此由六百里各諭令知之○庚戌 慈安皇太后聖壽節 御慈寧宮 上率王以下文武官員

行慶賀禮○諭議政王軍機大臣等官文奏官軍剿賊疊勝糧道疏通見擬移營黃岡督剿並英山已無賊蹤暨豫籌出境剿賊擬派大員督軍各摺片髮捻屬集麻城之白杲地方環逼營壘阻我糧道經成大吉等防剿兼施疊獲勝仗糧道得以疏通其洗馬畝蔡家河一帶賊匪經梁洪勝等分路追殺敗賊潰入團陂黃岡壇坪踞賊復經富森保派兵狙擊均有斬擒是鄂境各股逆匪勢燄漸衰亟應乘勝掃蕩僧格林沁所派之色爾固善及善慶兩軍均已抵紮麻城其蘇克金一軍亦在黃土岡由北面進逼而自陝回援之藍斯明等各營復分紮蘄黃要隘溫德勒克西等已抵黃陂姜玉順自樊城拔營計日即可到楚大兵雲集聲勢甚盛著僧格

林沁官文督飭馬步水陸各軍乘金陵已克賊心震懾之際併力夾擊盡殄狂氛毋畱餘孽惟賊計狡獪難保不鋌而走險爲避兵之計豫省南路邊防最關緊要張之萬務當豫籌布置扼要嚴防毋令一賊得以竄越官文見已移營黃岡並著督飭各路將弁會合僧格林沁所派之軍將髮捻各逆四面兜擊毋令餘匪紛竄鄰省致滋蔓延官文另摺奏豫籌出境剿賊擬令唐訓方督帶楚兵等語自係爲先事圖維起見惟唐訓方本日已簡放直隸藩司吳昌壽到鄂後該員卽須前赴新任將來髮捻萬一他竄必須大員督軍出境追剿屆時再行請旨辦理將此由六百里各諭令知之○諭前因李雲麟奏餉項支絀請將毅健六營先行撤回楚省當因所奏尙係實在情形諭令將楚軍六營交遊擊金殿安等妥爲管帶赴鄂毋令沿途滋事茲據官文奏湖北先後撥解李雲麟援

陝楚軍餉銀已逾十四萬兩截至四月底止並無欠缺五六兩月
餉銀陸續籌解後自七月起楚省實難再顧而五月十八九等日
已有李雲麟所部毅健營潰勇二百餘名由水路行抵夾河陝西
白河縣水陸兩路亦有潰勇過境等語是五月餉銀始議停止甫
及旬餘卽多逃散可見該京堂約束不嚴非盡因停餉之故且紛
紛潰散難保無沿途滋擾情事著劉蓉迅派委員確切查明從嚴
究辦並查明此項勇丁如未全數啟行見在畱陝若干卽將官文
此次解款銀兩由李雲麟酌量散放妥爲安置俾遣撤各勇不至
別滋事端川陝交界防剿正當喫緊著李雲麟督率所畱隴軍嚴
密堵擊不得因楚勇旣撤藉口兵單希圖誘卸李雲麟所部兵勇
前此克復山陽剿辦回匪出力曾經諭令官文等查明保獎茲據
官文聲稱遠在楚省打仗情形無從詳悉仍將原保底單咨送劉

替就近辦理並咨覆李雲麟等語著劉蓉詳悉查明會同李雲麟

覈實保獎毋許冒濫將此由六百里各諭令知之○以鍾岱爲倉

場侍郎

由左副都御史遷

○實授沈桂芬山西巡撫調吳廷棟爲戶部左

侍郎以譚廷襄爲刑部右侍郎鄭敦謹爲河東河道總督唐訓方

爲直隸布政使唐際盛爲湖北按察使

由荆宜施道遷

○辛亥諭議政王

軍機大臣等恩麟奏大兵攻克平涼收復瓦亭東路見就疏通亟

須籌辦西北各情形一摺雷正綰等攻克平涼後餘賊竄入瓦亭

峽城內復經官軍奪其要隘賊匪北竄自應乘勝進兵節節掃蕩

前據都興阿奏督飭杜嘎爾帶領派出各軍由石觜山渡河繞赴

甯夏而雷正綰自攻克平涼後一切進兵情形未據入奏見在甯

夏靈州一帶匪眾麇集而平涼瓦亭兩處敗賊又盡數北竄勢饒

愈張必須南北兩路大軍會合夾擊方可制賊死命又恐賊匪乘

虛西竄則中衛正當其衝該處一片孤城僅有梁生嶽所帶兵勇駐紮爲數無多恐不足恃且靖遠又有續到之陝西回目黑牙古赫明堂等帶領數萬之眾具稟乞撫此輩人數過多勦撫均屬不易設或包藏禍心計圖一逞其患尤不可勝言著都興阿迅飭杜嘎爾等渡河之軍由北而南節節進擊雷正綰移平涼得勝之師取道北攻會合都興阿派出各軍實力狙擊立埽狂氛迅克甯夏漢城立解甯夏滿城並平羅之圍並飭陶茂林繞過西面駐紮中衛靖遠適中之地約會南北兩軍併力兜擊兼防甯靈賊匪西竄之路黑牙古等率眾乞撫既據該護督稱其人數太多安插不易卽著飭令楊柄鏗暫示牢籠隨時防其中變毋稍疏虞並著雷正綰到後斟酌情形妥籌辦理毋貽後患將此由六百里諭知都興阿雷正綰並傳諭恩麟知之○壬子諭內閣前諭曾國藩將江甯

首逆洪秀泉剝屍梟示並將生擒之逆酋李秀城洪芒達二犯檻送京師茲覽曾國藩奏各將士於六月二十七日在僞宮內掘出洪秀泉逆屍經該大臣等驗畢戮屍焚毀該逆雖逃顯戮於生前難免極刑於身後亦足以大快人心其李秀城被擒時各營降卒及附城居民人人皆識並據歷供髮逆始末甚爲詳悉等語李秀城洪芒達二犯本擬解京訊明處以極刑惟此等跳梁小醜本無所用其獻俘且恐沿途派兵遞送騷擾驛傳重累吾民旣據供認明確著曾國藩無庸派員解京卽於江甯省城將該二犯凌遲處死並傳首髮逆所到各省以申天討而儆兇頑○諭議政王軍機大臣等曾國藩奏訊取洪李二逆供詞就地正法並籌辦善後一切事宜一摺洪芒達李秀城二逆前雖有旨解京惟此等內地叛民本與獻俘之例不合且究非洪秀泉可比該大臣於訊明後卽

在江甯省城將該二犯極刑處死免致沿途騷擾地方所辦甚是惟京外皆知二犯解京茲忽中止恐觀聽不明轉生疑竇且恐各處逆匪因而造言煽惑故本日明降諭旨令該大臣將二逆就地正法著該大臣仍將洪李二逆首級傳示被擾地方以快人心而息浮議仍著該大臣將李秀城供詞及奪獲偽印等物齎送軍機處備查逆擄金銀朝廷本不必利其所有前據御史賈鐸具奏故令該大臣查明奏聞今據奏稱城內並無賊庫自係實在情形惟帑藏空虛兵餉匱竭而善後應辦之事尙多應如何籌策萬全之處該大臣仍當悉心經畫此時回安慶一次布置上游軍事曾否啟行俟八九月閒仍須回駐金陵籌辦一切事宜彼時曾國荃渥疾諒可痊愈卽遵前旨令與彭玉麟分駐九江安慶以固長江門戶至裁撤兵勇一節雖爲節餉起見然驟撤至三四萬人恐此輩

久在戎行不能省事必致隨處嘯聚爲亂從前川楚善後積至數
年方始肅清可爲殷鑒不若先汰老弱而以精壯各軍分赴江楚
俟江楚一律肅清再議裁撤歸農或挑補各營兵額俾不至復生
枝節方爲盡善該大臣其慎以圖之李臣典開挖地道得竟全功
前已錫之子爵今聞遽因傷病身故殊堪痛惜著該大臣將該故
員生平功績戰略及此次因傷致病各情形詳悉具奏再降諭旨
褒卹將此由六百里諭令知之○諭楊岳斌沈葆楨奏會剿崇仁
埭平賊壘一摺崇仁逆股在城外添築賊壘江忠朝一軍擊其左
席寶田一軍擊其右左右兩路之賊皆潰該逆繞竄潘橋秀才埠
一帶城賊傾巢攻撲席軍營盤均經官軍擊敗乘勝攻破賊卡十
餘處礮中僞王宗李元茂左肩立平四壘官軍見在進攻崇仁附
城賊壘著楊岳斌沈葆楨激勵將士乘勝踴平逆壘迅將崇仁克

復殲滅侍逆巨股以次進剿肅清各路之匪濂逆聚悍黨於許灣以爲崇仁聲援並著檄令鮑超由撫州先期許灣以孤賊勢王沐卽移紮崇仁豐城之交以固江席兩軍後路本日曾國藩奏由金陵仍回安慶料理上游軍事前諭該大臣等江省如陸軍單薄將金陵陸師酌量調派著曾國藩悉心籌畫如須添兵赴江協剿卽著迅速調撥以厚兵力將此由六百里各諭令知之○廣湖北鄉試中額二名○癸丑左宗棠奏蔡元吉一軍進駐東埠堵逆黃汶金見其懸軍深入糾集悍黨於六月初八日起疊次攻撲營壘初十日又分巨股繞出思溪雙福橋等處築壘以截蔡元吉餉道溫州鎮總兵劉連捷等急起援之因港汊紛歧未能得手十八日蔣益澧督率親兵及賀國輝一營親赴菱湖督剿十九日馳抵菱湖翌日卽會合諸軍進剿飭李邦達等進攻思溪高連陞等進攻雙

福橋一鼓突前壘已垂破忽援賊從左右樹林鈔出我軍幾爲所乘蔣益澧急麾親兵策應賊始敗遁二十二日水陸各軍專攻雙福橋該逆負嵎不出蔣益澧令鄧沆明等分三營逼紮思溪更番疊戰該逆仍鼠伏不出相持至未申之交堵逆黃汶金率悍黨數萬拌死來犯官軍分投迎敵蔣益澧高連陞匹馬陷陣各將弁一齊向前立斬大旗悍賊十餘名賊始潰敗時洋將德克碑見各軍連日苦戰率隊前來助剿二十七日德克碑用開花礮向雙福橋轟攻半日亦未得手二十八九日至七月初二日各軍奮力猛攻距蔡元吉營僅一河之隔因對岸賊營環逼未能得達而蔡元吉各營自六月初十日起晝夜鏖戰歷二十餘日糧已垂盡士氣未衰臣見調省城防兵令署杭州協副將徐文秀等馳往助之其楊昌濬進扼銅嶺一軍於孝豐攻克後卽會同總兵周廷瑞於六月

十八日分路進攻安吉周廷瑞攻西北兩門楊昌濬攻東南兩門參將朱尊賢首先搶上礮臺立斬悍賊三名忽爲洋礮所中陣亡道員朱明亮等麾軍猛攻逾時迄未得手竊惟湖郡北濱太湖東南則港汊紛歧西南則嶺路複峻故厯代取吳興皆由太湖廣德長興進兵以地勢順而糧運便也此次浙軍由東西南三面進攻勦數月未能剋期蕺事實地勢有以限之安吉居萬山之中官軍進取爲難欲攻安吉必先攻梅溪欲攻梅溪非蘇師進攻四安不足以分賊勢已與江蘇撫臣李鴻章函商昨接孝豐守軍報稱據金陵逃出難民供僞幼王洪福瑱於六月二十一日由東壩逃至廣德二十二日堵逆黃汶金迎其入湖州府城查湖郡守賊黃汶金等皆積年逋寇賊數之多約計尙十餘萬此次互相勾結本有久持之意儼復藉僞幼王爲名號召賊黨則其勢不遠他竄可

知且江西兵力漸集李侍賢汪海洋諸逆如不得逞志於江西則遁入浙閩復與湖州踞逆相首尾亦未可知臣惟有與曾國藩等慎以圖之以冀仰紓宸廑上諭議政王軍機大臣等蔡元吉一營孤懸東埠逆賊圍之數重該營糧已垂盡而士氣不衰亟應乘勝合擊以解重圍洪瑱幅諒卽洪福瑱昨據曾國藩奏洪福瑱積薪自焚茫無實據似已逃出僞宮李秀城供曾經挾之出城後始分散其爲逃出已無疑義湖熟防軍所部斬殺淨盡之說全不可靠著曾國藩查明此外究有逸出若干並將防範不力之員弁從重參辦此犯已至湖州必將號召羣逆爲久踞之計左宗棠正可督飭蔣益澧等令其激勵各軍許以重賞果能一鼓攻拔將洪逆及諸逆等悉數殲除則東南全就肅清朝廷破格施恩若遷延日久或令他竄亦必重治其罪不能因前曾立功稍從寬貸也楊

昌濬攻安吉之師既不得手著卽令其先攻梅溪並著李鴻章督飭派出各軍力攻四安以分賊勢前派往金陵之礮隊等一萬餘人俱係精銳或派往四安或分赴廣德均可期其得力該撫向來不分畛域左宗棠亦非妬功忌能之人卽著李鴻章督令諸將弁認真助剿以收廓清之效並一面分兵嚴防湖賊旁竄各路廣德地屬數省衝要歷代規取吳興多由於此從前各路無兵可分是以未能派兵駐守以致僞幼逆及黃汶金等往來無阻見在江甯得勝兵將甚多昨據曾國藩奏述李秀城供內有廣德不攻自遁之語可見廣德見在並非無賊著曾國藩多撥精銳派得力將弁統帶赴廣德攻剿如賊已遁去亦卽力遏要衝以免湖逆出竄皖南爲江西後路之患左宗棠李鴻章均應設法兼顧嚴密兜圍毋令旁竄江西兵力此時亦已厚集李侍賢汪海洋諸逆不得逞志

於江西則將遁入浙閩與湖州踞逆相首尾且聞洪幼逆尙在難保不圖死灰復然楊岳斌沈葆楨亦當督飭諸軍妥慎防剿均須各就本地盡力剿除俾東南諸郡全就蕩平以副委任將此由六百里各諭令知之○諭恩麟奏鹽固逆回北竄甯靈滋擾中衛靖遠二縣暨撤回句結占踞循化廳城番賊節次闖入馬廠搶掠馬匹各一摺甘省鹽茶固原回逆糾眾三四千人於五月二十五六等日竄至靈州所屬之同心城旋分股竄撲中衛縣屬之甯安恩和等堡與甯郡回逆句連一氣擬將各地麥田搶割後分走花馬池中衛縣拒敵官軍其陝西臨渭之賊亦連日焚掠鹽固四鄉並靖遠北山後一帶前次率眾乞撫之回目黑身古等亦聞風煽動傳知河州東鄉回匪欲爲應援賊情甚屬狡悍見在中衛靖遠各要隘防兵不及千名中衛係四達要衝靖遠爲甯靈等處入省咽喉

喉省城兵力亦單防剿均關緊要雷正綰所部各軍兵數較多能否酌留數營歸陶茂林管帶剿辦南路張家川股匪其餘各營卽由雷正綰統帶星速馳赴蘭州慎固省防妥籌分布或酌派勁旅分扼中靖各要隘或督率各部擇紮適中地方兼籌戰守並著都興阿雷正綰相度機宜妥商辦理都興阿所統諸軍已漸入甯境如未能分兵南顧省垣卽專力規復甯夏漢城以牽賊勢恩麟仍當嚴飭梁生嶽等就見在兵力扼守中衛靖遠各隘毋令賊勢復行煽結儻再有疏虞必將該員弁從重治罪循化廳屬街子等上四工撒拉與城內寄居之保安逆回潛行勾結襲撲廳城護參將陝成英等拒戰受傷擁護難民出城旋致城垣失陷恩麟見調洮州卓泥土司楊元等壯健番士兵丁分扼關隘進襲撒巢卽著催令同知吳鼎元迅速赴任與陝成英號召附近良撒會同番土各

兵力圖克復廳城並著玉通酌派精銳弁兵協力助剿毋得稍分
畛域至清水工等下四工撒拉自稱願隨官軍助力是否出於至
誠前據恩麟奏稱回目黑身古率眾乞降此次回擾甯靈黑身古
卽行煽變可見若輩詭詞求撫毫不足恃惟下四工撒拉等見已
安靜如常總當飭令陝成英等妥爲撫馭嚴密防維毋令踞城撒
回得以乘閒竄惑至涼州鎮屬平羌口等處疊有番賊闖入內地
將羣生收厰營馬先後搶去多隻該處防卡弁兵未能加意周防
實屬疏懈著恩麟嚴飭遊擊楊逢春等嚴密緝捕隨時偵探毋任
再行闖入牧厰並查明各隘口疏於防範之營弁一併交部覈議
將此由六百里諭知都興阿雷正綰玉通並傳諭恩麟知之○諭
恩麟奏接准吐魯番領隊大臣咨稱該城所屬之托克遜漢回變
亂請將伊犁前調甘肅官兵並程應援並准哈密辦事大臣咨稱

吐魯番回匪滋事哈密存兵無多請催令伊犁前調官兵星速前
廣甘肅剿辦回逆兵力不敷實屬無可抽派請飭科布多等處撥
兵援剿等語吐魯番所屬之托克遜漢回變亂究竟因何起釁及
見在情形何以未據榮慶入奏此時伊犁南路之庫車回匪方熾
而該城地方又復起事若不迅圖撲滅新疆各城均係漢回雜處
誠恐聞風響應滋蔓難圖惟甘肅兵單萬難分撥前據常清奏調
該省兵五千名往援庫車已將甘省情形諭知該將軍妥籌另調
見在吐魯番回匪滋事城小兵單需兵孔亟著麟興車林敦多布
廣鳳奎昌各於烏里雅蘇台科布多二城屯防漠蒙古兵內酌撥
勁旅二三千名卽日取道北路星馳前往實力援剿以期便捷並
著保恆另行籌調官兵設法援應疏通道路一面將哈密防務豫
爲籌備毋稍疏虞榮慶見權邊寄當此陝甘庫車回氛未靖尙復

毫無準備該員平日所司何事著卽就存城兵勇分別良莠速籌
剿辦儻任該逆蔓延惟榮慶是問伊犁等處遣勇從前隨剿回疆
頗稱得力卽著常清平瑞各於所管遣犯內揀選精健可用遣勇
各數千名聽候調撥一面偵探該城賊勢迅籌援剿毋得張皇坐
視致誤戎機將此由六百里各諭令知之○予甘肅陣亡訓導何
雲翹浙江陣亡參將朱遵賢祭葬世職○甲寅戶部左侍郎吳廷
棟以金陵告捷請益加倣懼得旨吳廷棟所奏萬方之治亂百官
之敬肆皆推本於君心之喜怒深得杜漸防微之意軍興以來億
萬生靈慘遭鋒鏑卽已治已安猶當兢業矧江楚等省餘孽未靖
正當上下交儆吳廷棟摺著交弘德殿用資省覽○乙卯 文宗
顯皇帝三周年忌辰 上詣 奉先殿行禮○詣觀德殿 聖容
前供奠○河南巡撫張之萬等奏移營汝郡前敵已抵麻城並團

練大臣毛昶熙來汝會捕得旨馮灣等處匪徒著督飭趙鴻舉等實力搜捕其招墾荒地訓練營兵各事宜均著妥爲經理以收實效○丙辰諭議政王軍機大臣等喬松年奏馳抵壽州並赴正陽關察看形勢見擬仍駐壽州派朱淮森兩營扼紮正陽蔣凝學進紮英山張德勝防守六安等語湖北之賊見麕聚羅田麻城一帶或由英霍或由固始商城入皖均難豫料該撫旣以壽州形勢甚便並可兼顧正陽卽著駐紮壽城將所部各營勤加教練仍一面多發偵探視賊趨重何路卽由何路進剿並飭朱淮森蔣凝學等軍分扼要隘嚴密堵剿毋稍疏虞一切戰守機宜仍隨時咨商僧格林沁妥籌辦理另片奏李世忠部下訛名總兵陳玉安於散勇應領鹽斤扣畱不發以致眾勇不服該總兵竟商同副將劉同盛將勇丁王在綸等三人殺而埋之廟中似此膽大妄爲實屬大千

軍令陳玉安劉同盛均著卽行革職並著喬松年飭屬將陳玉安一犯嚴拏務獲與劉同盛一併嚴審按律懲辦至李世忠遣勇不下數萬朝廷正慮其滋事如該革員等任意剋扣勇丁兼敢逞兇殺害勢必激成事端著喬松年嚴密訪查如再有此等情事卽行從嚴參辦毋稍姑容將此由四百里諭令知之○諭徐宗幹奏臺灣官軍攻克彰化小埔心賊壘生擒渠逆平毀匪莊曾元福丁曰健各奏生擒陳啞狗弄並獲僞太子戴能戴如川及股首張三瀨寺多名沿海賊莊俱已肅清等因曾元福剿除小埔心賊壘將陳啞狗弄等殄除尙爲迅速惟洪機等皆係著名巨匪見在逃往何處裹脅人眾當亦不少各摺均未言其下落著左宗棠徐宗幹嚴飭曾元福丁曰健等上緊緝拏務獲免致再行勾結生事彰化餘匪仍著曾元福認真搜捕各屬招集流亡安撫良善著該鎮道會

同妥辦林天河在籍逞強橫行無忌丁曰健有地方之責應行隨
事裁抑不得任其魚肉鄉里大爲閭閻之害徐宗幹另摺奏浙省
平陽會匪潛赴福甯窺伺圖擾經署福甯鎮鍾寶三等拏獲多名
審明正法並據報溫處道周開錫已由郡帶兵勇前赴平陽泰順
一路搜捕並經平陽縣余麗元等獲犯多名而股首尙有未獲餘
犯亦未盡殲除著左宗棠徐宗幹嚴飭周開錫鍾寶三等督同府
縣紳董嚴密查拏務將股首趙辛卽趙阿虎及在逃之陳田壁等
犯按名弋獲不准任其漏網致貽後患將此由六百里各諭令知
之○諭丁曰健奏署陸路提督林文察於破林巢後安住家園五
十餘日頓兵不出兼有胞叔林天河倚勢作威眾議沸騰又協剿
陳逆未能攻克在彰逗遛月餘剿匪事宜竟置不問又與署水師
提督曾玉明紮營彰城兵勇騷擾紳民怨恨離心等語林文察等

以專閫大員當此軍務喫緊之時宜如何振刷精神激勵將士若如該道所奏節次頓兵逗畱縱勇滋擾員屬大負委任著左宗棠徐宗幹確切查明如實有前項情事即著嚴行參辦毋稍徇隱原摺摘錄鈔給閱看將此各諭令知之○丁巳諭議政王軍機大臣等馮子材魁玉奏江南軍務大定請將鎮防兵勇七千人全行凱撤至江防重地俟全軍遣散後或由曾國藩等派兵駐守等語所籌自係爲節省經費起見見在京口一城自無須重兵扼紮惟江南新復廣德湖州之賊尙未剿平金壇等處防兵應否酌畱一二營以資彈壓其裁撤勇丁或擇其精壯可用者卽以挑補該省綠營兵額之處著曾國藩李鴻章馮子材等會商妥籌辦理至軍營遣勇關繫至要馮子材等務當飭令統帶各員分起彈壓妥爲資遣不准沿途逗遛致滋事端另片奏甘肅西甯鎮總兵黃武賢陝

西延綏鎮總兵陶茂森懇請開缺回籍養親等語該二員平日帶隊尙稱得力見在陝甘軍務亦尙未竣當此用人之際殊難遽允開缺致投閒散惟念其從征十餘年情殷將母詞意懇切黃武賢陶茂森均著賞假兩箇月回籍省親毋庸開缺一俟假滿卽行各赴新任以重職守將此由五百里各諭令知之○諭都興阿奏官軍渡河剿賊獲勝攻克姜家村等賊巢進攻寶豐雷正綰奏通籌布置會攻張家川鹽固回匪投誠各摺片都興阿派撥各軍由草地繞出石觜山渡河援剿疊獲勝仗賊寶豐遁去杜嘎爾督軍追剿攻克姜家村紅柳堡兩處賊巢見在檄催平羅縣趕造雲梯乘勝進攻寶豐縣城卽著都興阿督飭杜嘎爾等所部奮力攻剿迅拔寶豐將賊氛次第掃蕩進窺甯夏漢城見在金陵奏捷擬將兵勇酌量裁撤或調赴各營助剿都興阿久在揚防從前所部將

弁兵勇得力者諒復不少如兵力尙覺單薄即可咨明曾國藩等酌量調撥赴甘以利攻剿雷正綰自攻拔平涼平毀固原瓦亭驛賊卡後與陶茂林籌商會軍進攻張家川賊巢以期堵制鹽固等處竄匪疏通驛道兼顧省垣所籌均尙周妥見已屢獲勝仗將張家川木城攻拔殲除悍逆多名卽著督飭各軍會同陶茂林所部合力環攻張家川土城迅圖克拔進剿龍山鎮蓮花城等處以期次第肅清前據恩麟奏稱鹽固逆回竄撲中衛等境該二處回民旣已投誠何以復行出境滋擾並著都興阿雷正綰飭令署臬司楊柄鐸等慎密防維妥爲撫馭固不可激之生變牽掣我軍亦不可墮彼狡謀致誤全局隆德靜甯在防諸軍並由雷正綰妥爲布置俟攻克蓮花城等賊巢後隨時詳察機宜與都興阿妥籌辦理中衛靖遠各要隘並蘭州省垣兵力均單都興阿雷正綰仍懍遵

前旨妥籌兼顧毋稍疏虞將此由六百里各諭令知之○諭都興阿奏官軍渡河剿賊獲勝一摺據稱杜嘎爾率領前敵各軍由草地繞由石嘴山渡河進援甯夏深入數百里尙能以少勝眾惟軍火糧餉未能接濟慶陽糧臺僅撥銀五千兩軍火鍋帳等項尙不敷用此時無論各員鹽折零星雜費無出卽杜嘎爾前敵各營食米亦由訥欽營內協餉湊那千兩採辦小米以資濟運以三千數百馬步不足十日之糧各屬籌辦米麵僅據定邊解到小米一百餘石寶屬籌辦無方等語甯夏軍情望援已久而都興阿進兵之際各營軍火餉糈竭蹶至於此極該士卒荷戈枵腹豈能責以成功且杜嘎爾等馬步各軍業已渡河逼近賊巢設使餉糈不繼則孤軍深入腹背受敵貽誤豈堪設想著沈桂芬無論何款先行籌撥銀萬兩迅速委員解赴慶陽糧臺以資接濟該省於甘省餉需

尙能竭力籌畫惟當此軍情緊要尤當妥速籌解以濟急需陝甘
唇齒相依屢經有旨令劉蓉力籌協濟該撫豈能坐視並著劉蓉
隨時設法籌濟毋得稍分畛域致誤事機文煜專辦甘省糧臺責
無旁貸亦當悉心籌策以贍飢軍著卽咨行協甘各省派員迎提
並於山陝協餉解到時迅卽提解都興阿軍營以利軍行而維大
局將此由六百里各諭令知之○諭保恆奏漢回變亂擾害地方
並省垣不靖大概情形一摺據稱奇台地方漢回械鬪大股回匪
雖已剿除恐仍糾眾報復古城漢回於六月二十日夜變亂放火
鋪戶延燒殆盡滿營兵單調回在奇防堵官兵並知會文光督勇
合剿再月之十七日有差兵由烏魯木齊回營據稱派赴庫車救
援官兵內逃回滿兵一名報稱官兵行至喀喇沙爾所屬之烏什
塔拉戈壁突遇回匪官兵被害等語烏垣漢回聞風變亂該差行

至距五六里之紅山觜地方遙見漢城火光起居民紛竄保恆
專差偵探旋據回稱阜康迤西俱有回匪阻擋道路不通等語覽
奏實深詫異各城回匪多有變亂保恆見署古城領隊大臣何以
任聽匪徒聚眾放火延燒民房鋪戶甚多而先事毫無準備見雖
將賊擊退仍恐復有變亂必須嚴密防維所有派往奇台防堵之
滿漢官兵卽著調回並飛速知照文光令其督率民勇速到古城
合力痛剿以清餘孽濟木薩派來防堵官兵並准畱古城以資得
力奇台餘匪未清仍著保恆酌量畱兵防剿前據平瑞業布沖額
各奏遣勇朱小潰謊報軍情以致烏魯木齊城外軍民回漢人等
慌亂旋將朱小潰正法人心安定等情當經諭令該都統等將內
外居民加意撫綏茲據保恆奏稱所探各情似在該都統等奏報
以後是否仍因前此謊言致有訛傳抑係後來復有變亂見在烏

魯木齊情形若何未據平瑞等續有奏報著平瑞業布沖額速將烏城實在情形趕緊馳奏以慰懸繫文祥應援庫車見已行抵何處並著探訪烏城情形迅速具奏新疆各城紛紛構釁常清爲諸城領袖亟應多設偵探以期聲息相通其已亂之處應如何調兵剿辦未亂之處應如何豫防釁端均係該將軍分內應辦之事豈能莫展一籌任令罪蹤延蔓著卽迅速設法妥籌辦理以靖邊圉喀喇沙爾有僻路可通烏城南山一帶恐有匪徒暗中勾結著依奇哩認真防範毋稍大意保恆摺內所稱派赴庫車官兵內逃回一名報稱官兵行至喀喇沙爾所屬之烏什塔拉戈壁突遇回匪官兵被害等語殊未明晰究竟回匪如何滋事官兵被害幾人見在道路有無梗阻著依奇哩查明具奏將此由六百里各諭令知之○諭張凱嵩奏越南例貢屆期據情代奏並密陳南太兩郡尙

有梗阻可否照案暫行展緩各摺片越南國王阮福時因見屆乙丑例貢之期請將上二屆丁巳辛酉兩貢一併恭進具見誠惻亟應行令依期入貢以遂其愛戴之忱惟張凱嵩所陳左江南太兩郡道路尙多梗阻繞越無從自係實在情形已照該撫所請准其暫行展緩矣越南國例貢業經三屆展緩恐遠人或生缺望著張凱嵩於軍務完竣道路疏通之時卽行奏明請旨毋庸遲至下屆例貢之期始行令其併進並由該撫宣布朝廷德意俾該國王知悉以示體恤將此諭令知之○乙未諭議政王軍機大臣等楊岳斌沈葆楨奏官軍克復崇仁縣城大概情形暨攻克東鄉摺片諒詳細戰狀已奏報在途矣江忠朝等軍疊次逼攻崇仁埽清城外賊壘茲於七月十一日攻克縣城據稱賊向宜黃一路遁走著卽督飭各軍乘勝追剿迅克宜黃等城節節埽蕩侍逆李侍賢見在

竄往何處務須探明蹤迹併力追擊就地殲除毋令免脫鮑超駐師許灣勦辦康逆一股是否業經得手崇仁旣克賊氣已奪想該提督必能與江忠朝等軍聯絡一氣盡殲醜類東鄉克後踞逆有無逃竄著楊岳斌沈葆楨查明具奏並卽檄令周寬世等軍認真搜捕進規金谿力圖攻拔毋稍鬆勁皖南一帶防勦最關緊要著楊岳斌懷遵前旨妥籌兼顧毋稍疏虞將此由六百里各諭令知之○山東沂州府匪首杜淵儀被獲伏誅○庚申諭內閣戶部奏蠲免錢糧已輸在官准流抵次年應完正賦則例所載防弊本極周詳無如各州縣積習相沿機詐百出或停閤蠲免詔旨先期催追或藉無流抵明文闌入私橐卽或業戶中偶請示遵而官吏胥差互相聯絡游詞飾說巧爲欺蒙倚勢作威肆其侵蝕故遇免徵之年追呼不已已輸之賦扣抵無期是以厯屆蠲免難霑實惠卽

如本年四月蠲免江屬諭旨有流抵字樣正月初二日蠲免蘇屬
諭旨無流抵字樣載與不載厥例維均恐小民無知或起猜疑之
竇官吏藉端影射巧索強取請申明定例嚴防弊端等語向來蠲
免省分其全年蠲免先期輸官者准其流抵次年應完正賦其蠲
免定有分數先期全輸在官者除應徵分數外餘應蠲免分數亦
准下年扣抵立法至周乃近來不肖官吏因緣爲奸致小民踴躍
輸將反飽貪殘囊橐上行其惠下屯其膏喪心昧良莫此爲甚嗣
後各省官吏如再有隱匿騰黃蒙混流抵各項弊端著該省督撫
大吏查明嚴參按照侵盜錢糧律治罪並著刊刻騰黃徧行曉諭
以後遇有蠲免年分著永遠將此旨一併刊刻宣示仍著戶部查
照從前例案通行各直省以期實惠及民無資中飽將此通諭知
之○諭議政王軍機大臣等恩麟奏勦辦河州回匪獲勝請飭馬

德昭赴省帶兵都興阿駐紮省城並番兵助剿情形各摺片狄河
回逆勾結撒拉回匪紛擾河州與河北之川城馬營等處回族互
相犄角經趙必達率領果義軍進剿連戰皆捷並將川城賊巢平
毀而馬營賊勢甚張竟勾結河南撒匪直撲周玉超營盤縱火延
燒以致營盤失守三座陣亡營官及勇丁多名是該逆並未大受
懲創見在河州逆匪盤踞如故南岸之賊復將偷渡助援馬營逆
勢尙形聯絡而果義軍與河州官軍聲勢中梗亟應迅籌勁旅早
殄逆氛著恩麟一面添調兵勇一面檄飭河州文武督率番兵嚴
密堵剿並飛飭趙必達迅將馬營之賊實力剿除以次肅清河秋
務使南北兩岸之賊不得聯爲一氣庶辦理易於得手買吾剛拭
多哈各族番丁助剿甚爲得力並拉布浪火力藏等番族已到土
門關剿賊斃匪甚多深堪嘉尙惟該番丁等均係裹糧隨征必須

資其飽騰方可得其死力著恩麟將一應口糧犒賞之需妥爲接濟並加意激勵籠絡俾樂爲用馬德昭前已諭令赴僧格林沁軍營差遣勢難再赴蘭州都興阿進剿甯夏前敵業已深入亦難駐紮省垣惟根本重地兵力較單著都興阿雷正綰懍遵前旨妥籌兼顧恩麟暫權督篆責無旁貸仍當就見有兵力妥籌戰守不准意存諉卸致誤事機肅州回匪馬受海聚眾謀變該地方官剿捕尙爲迅速本日已明降諭旨將出力各員照所請獎勵回練馬添才經該匪約爲內應當卽入城稟報尙屬深明大義已將該練賞給六品頂帶以示嘉獎著恩麟仍飭在事各員將在逃之匪李城包大漢二名嚴拏務獲以靖地方將此由六百里諭知都興阿雷正綰並傳諭恩麟知之○景綸麟瑞奏俄官石沙木勒幅等乘坐輪船帶領兵役多名向松花江上駛聲稱欲由三姓往見吉林將

軍議辦要事臣等派員迎阻堅不允從並在沿途觀繪山川形勢已於本月初七日行過胡爾哈河向小古洞河一帶上駛奏入論總理各國事務衙門照會俄國駐京公使據理剖辯○辛酉李鴻章奏查展舍悍賊腐集北自織里至湖濱西自錦山至湖郡一片蔓延六月二十二日潘鼎新調派各軍搶築三營於二十四日分路環攻用礮船轟擊將展舍北街及臨河石壘盡行轟倒西面援賊忽至丁壽昌唐宏成併力夾擊賊倚兩河爲濠我軍晷過第一河賊以排槍死抵丁壽昌等揮勇過第二河詎賊於河內木椿上密釘鐵籤我軍更番猛撲未得上進翌日李朝斌從太湖駛至與潘鼎新周察形勢議須逼近紮營便於轟礮潘鼎新令夏金標在對面頭濠外乘夜搶築營壘令方有才等乘夜兩面築營爲犄角之勢李朝斌復添調太湖水師四營登岸出隊二十七日各軍會

合齊進賊匿壘穴中狙擊迄不少動太湖水師營官江福山帶隊登岸大呼躍濠各軍繼之將近賊壘適錦山織里援逆兩面大至江福山摧鋒直前被槍子洞胸立時陣亡我軍水陸夾擊斃賊極多賊始敗回仍於營外添築長牆一道七月初一日李朝斌自帶水師三營與唐宏成攻晟舍北街潘鼎新令潘國揚等各營攻晟舍中街用炸礮轟塌礮臺一座忽新添悍賊三四千人拌命死守我軍勢難銳進潘鼎新因思賊營隔河非廣搭浮橋不能越衝十一日令潘國揚潘鼎立等分繞北路搭橋晝夜輪攻牽制賊勢次日搶成浮橋數道十三日潘鼎新等從北路進兵丁壽昌等從中路進兵夏金標等從南路進兵李朝斌派水師臨河轟擊並令浙軍張景渠出隊協剿自辰至午賊營盡塌北路潘鼎立等先奪利濟寺卡繼破總管堂賊營中路丁壽昌等填河拔樁攻破兩壘南

路夏金標等與田名魁等水陸並衝將靠塘大石壘攻破賊眾棄
壘狂奔我軍合力窮追截賊過半計共踏毀石壘八九座轟斃般
斃淹斃無數臣查晟舍當湖州東南地勢憑河本極險固潘鼎新
等督率水陸晝夜猛攻卒以苦戰力拔堅巢從此湖東賊勢漸衰
不難次第剿洗此次尤爲出力之常鎮通海道潘鼎新等攻堅奪
隘百折不回可否先行開列獎勵出自聖主鴻慈其陣亡各員
弁並請飭部分別議卹建祠又奏六月二十二日郭松林由長興
拔隊前往呂山察看賊於山南北及山腰各築一壘郭松林督隊
進剿賊分前後兩路下山迎拒參將廖玉林首先衝入山腰賊壘
被礮子穿腹登時陣亡我軍奮勇搶上山巔賊援中斷亦遂棄壘
狂奔共斃賊千餘名生擒二百餘名奪獲槍船三十五隻餘逆悉
遁歸尹隆橋老營二十七日王永勝等各軍陸續由跨塘橋進扼

尹隆橋大德橋對面均與賊壘隔河相望自永隆橋至虹星橋賊連營數十座卽由湖州竄四安廣德之正路也二十八日郭松林等議分三路滾逼賊以大股來襲陳忠德奮不顧身首先衝入賊陣各軍三面夾擊賊不能支陳忠德乘勝追殺直逼逆壘斃賊百餘名忽被槍子貫腦登時陣亡臣飛調參將劉玉龍馳往助攻先斷四安竄路再圖進逼湖城其陣亡提督陳忠德等均請飭部從優議卹陳忠德撲誠忠勇歷著戰績可否懇恩准於死事地方建立專祠伏候 聖裁又奏湖州踞逆僞堵王黃汶金等擁眾十餘萬仍圖死守實以廣德四安爲門戶見在安吉一路左宗棠派兵堵剿臣復飭郭松林等由長興呂山進攻尹隆橋大德橋一帶賊壘直擣中堅如能剋期攻拔則由湖州至四安之路已斷惟探廣德州城內外有僞王數人帶萬餘賊踞守該處東達湖郡西通東

壩北接建平溧陽爲賊匪來往要道實皖浙江蘇三省之樞紐目
下蘇境肅清腹地無事臣擬派見守句容溧水之劉銘傳統帶所
部並見守南渡之周盛波各營由東壩建平前進以剿爲堵相機
攻取且與郭松林等西路各軍兩面夾擊較爲得勢仍力顧東壩
溧陽各防穩慎籌辦至廣德四安去路若斷誠恐湖賊鋌險內竄
沿湖東面亦須添兵防剿臣又添調見守常州之張樹聲所部六
營由平望前進會同潘鼎新劉秉璋合力進取並飭隨時商會浙
軍分道夾剿互爲聲援 上諭議政王軍機大臣等自回匪變亂
以來陝省受其荼毒雖經多隆阿盡力剿滅而甘肅回氛日熾都
興阿等尙因兵單道阻未能十分得手六月閒據新疆大臣等疊
次奏報庫車不守業經諭令伊犁將軍烏魯木齊都統等派兵救
援本月復據保恆等奏稱吐魯番古城漢回搆毀烏魯木齊亦有

同匪聚眾欲先攻漢城再攻滿城圖犯迪化烏魯木齊道路已不能通奏報罕見各城兵力本少近復缺乏將士往往有顧此失彼之虞若不設法急爲援救將來回疆各城與甘肅連城一片於西北邊地大有關係楊岳斌已授陝甘總督連日疊據該督等奏報江西克復崇仁東鄉金谿等城是江西情形已日有起色楊岳斌如能酌帶所部馳赴陝甘總督本任即可替出都興阿等辦理新疆軍務最爲兩得其宜惟楊岳斌起程赴任後督辦江皖軍務不可無人接替鮑超謀勇素裕能否勝督辦之任抑或江西軍務有鮑超劉典等兵力足資剿辦可以毋庸再需督辦之人均著曾國藩迅卽悉心酌度一面布置一面奏聞並卽飛咨楊岳斌催令迅速起程赴任總須兼顧西北大局仍於江西軍務不至稍形鬆勁方爲妥善楊岳斌所部楚勇如於甘省地勢不甚相宜卽可酌帶

與甘省相宜兵勇湊足數千整旅前進免致抵甘後再與都興阿
雷正綰等籌商勻撥新疆一帶絕少將材成發翔係寶缺巴里坤
鎮總兵著李鴻章迅卽飭令酌帶親兵前往赴任不得藉詞奏留
本日復據李鴻章奏派援湖州水陸各軍苦戰攻克晟舍等處賊
壘大獲勝仗並長興官軍攻克呂山賊壘滾紮尹隆橋各摺片晟
舍旣以血戰攻克湖東賊勢已衰著卽催令各軍乘勢進剿以期
節節掃蕩並著飛調開花礮隊渡河助剿將四安之賊悉數殄除
以絕竄路廣德爲數省衝要之區尤爲攻拔湖州進兵要路疊經
諭令曾國藩李鴻章派兵扼紮茲據李鴻章奏該州城內外尙有
僞王數人帶萬餘賊踞守爲賊匪往來要道該撫派員守句容之
劉銘傳等由東壩建平前進以剿爲堵相機攻取實能不分畛域
力爭上游可嘉之至著卽飭令劉銘傳周盛波認真剿辦仍力顧

東塘溧陽等處之防沿湖東面防賊內竄派遣員張樹聲等營進
剿毗山等賊營所籌亦妥著飭令在事各員穩慎圖功並須聯絡
浙軍互爲聲援以期萬全無失金陵旣克兵力已可騰出著曾國
藩仍遵前旨迅速調派勁軍回李鴻章派出之兵前赴廣德協
攻以資得力李鴻章另片奏署副將駱國忠請給假開缺回籍葬
親已降旨允准駱國忠由廣德自拔來歸厥後堅守常熟苦戰數
月卒保危城頗稱得力著李鴻章傳旨嘉獎並令其葬親事畢卽
行回營以資差遣曾國藩咨送李秀城供詞一本昨因議政王軍
機大臣呈進均已覽悉末段所載該逆宛轉求生乞貸一命請招
降江西湖北各賊言招降事宜有十要言洪逆有十誤均歸刪節
著將原供仍詳細鈔錄咨送軍機處無須節錄至李秀城供詞內
稱張國樑遺骸係伊用棺木收埋在丹陽寶塔根下等語著曾國

藩傳知曾國荃派員尋覓卽飭該故員家屬認領改葬以示追念
蓋臣之意將此由六百里各諭令知之○諭富明阿奏籌辦江甯
京口滿城善後大略情形一摺據稱江甯駐防額設官一百二十
三員兵四千七百餘名自被亂之後僅餘男婦老弱六百餘名口
雖陸續添設官二十七員兵二百五十八名營制稍定而顛連困
苦遺孑僅存又滿城自遭蹂躪兵房公所僅餘四五百間散布零
星毫無完善擬辦理稍有端倪再籌撥補江甯兵額至京口駐防
官兵雖已陸續挑補足額而應領俸餉五成尙不能全支額設房
屋焚毀無存露宿風餐尤堪矜憫請將該兩處駐防旗兵俸餉照
例全支並將房屋籌款建蓋等語江甯克復旗營駐防事宜亦應
早籌辦理該兵丁等以兵燹餘生餬口棲身尙難得所殊非國家
體恤旗丁之意富明阿見已咨商曾國藩李鴻章卽著該大臣等

妥籌款項迅將江甯京口駐防房屋早爲建葢以資棲止其兵丁俸餉能否卽行照例全支之處並著該大臣等妥籌辦理見在京旗駐防生齒日繁方擬於盛京吉林等處開墾閒荒以資生聚如挑其閒散陸續撥補江甯兵額能否有裨著曾國藩富明阿酌量情形妥商具奏至旗營器械馬匹富明阿擬將揚鎮遣撤各軍所繳軍械等項並揚防馬隊之馬及黑龍江張家口前次捐買馬匹一併截畱分給江甯京口駐防官兵照例由藩庫支領馬乾之處均照所議辦理江南駐防應辦各事地方新復案卷無存富明阿見派員赴京咨鈔底案卽著戶兵工三部將江甯厯辦冊案趕緊照錄飭交該委員領回毋稍延誤該將軍見赴江甯著俟與曾國藩籌商大略卽行迅回揚營將防務妥籌布置另片奏京口副都統杜嘎爾不識漢文不通漢語請與黑龍江對調或另簡賢員等

語杜嘎爾見在都興阿軍營一時尙難到任魁玉署理京口副都統所有應辦善後事宜著富明阿督同該員妥爲整理所請另簡妥員之處著候旨行將此由六百里各諭令知之○諭保恆奏烏城援剿喫緊請迅調蒙古官兵赴援一摺據稱本年六月閒烏魯木齊漢回變亂後該回匪聚散靡定四出剽掠保恆所調民勇因與漢回接仗失亡過多見俱遷延不進各城防均形喫緊勢難分兵救援並據由賊營逃回民人報稱羣賊議欲糾合西路回匪攻陷漢城後再攻滿城然後會合攻取迪化見在烏垣道路不通賊氛日熾請飭科布多揀派精壯蒙古官兵星馳來古援剿等語新疆各城自庫車漢回搆亂後烏魯木齊吐魯番及古城等處漢回相繼聞風煽變古城倡亂匪徒雖經保恆派兵擊敗而奇台餘孽未清刻下烏城逆眾欲勾結西路回匪次第攻撲滿漢兩城進擾

迪化賊情甚是兇悍古城存防兵勇勢難分撥進援著廣鳳奎
於科布多屯防蒙古官兵內揀派精銳二千名配帶軍火器械遴
委委員管帶星速馳赴古城迅將該城餘匪剿洗淨盡卽分兵馳
援迪化毋稍遷延並由保恆飛咨烏里雅蘇台將軍等迅卽派兵
應援烏城以厚兵力常清總統各城責無旁貸豈得一籌莫展坐
視不救著懍遵前旨多設偵探以通各路聲息並將見在業經煽
變各城應如何撥兵攻剿其未亂之處應如何豫防釁端一併迅
速設法與平瑞業布冲額妥籌辦理烏魯木齊見在情形究竟如
何平瑞惟當督飭存城滿漢各營兵勇迅籌防剿仍隨時與常清
籌商如就近各城尙有精壯官兵可資援剿卽一面奏聞一面分
撥並仍遵前旨將烏城變亂起釁情形迅速馳奏喀喇沙爾與吐
魯番庫車均係接壤且有僻路可通烏城南山一帶著依奇哩隨

時偵探嚴密防範或就見在存城兵力分籌進攻以剿爲防如土爾扈特和碩特之兵有可分撥亦卽妥爲駕馭應援各路毋得遷延株守坐失機宜文祥進援庫車見已行抵何處著卽星速前進與依奇哩會籌攻剿以期迅掃逆氛廓清邊圉古城未靖餘匪仍著保恆督飭見存兵勇速行剿辦巴里坤地屬鄰近當有可調弁兵亦著相機調撥毋再致有疏虞將此由六百里各諭令知之○予浙江陣亡提督陳忠德總兵官江福山祭葬世職建祠參將廖玉林祭葬世職○壬戌諭內閣前據祁寯藻奏屢次因病請假先後降旨給假安心調理茲據奏稱假期已滿病仍未痊懇請開缺並退出內廷差使等語祁寯藻年逾七旬精力尙健在弘德殿行走深資啟沃茲因舊疾屢發尙未痊愈奏請開缺情詞諄懇自應勉如所請祁寯藻著准其開禮部尙書之缺仍以大學士銜在弘

德殿行走俟調理就痊自行酌量進內毋庸拘定日期以示體恤
○諭議政王軍機大臣等玉明等奏匪眾竄擾昌圖拏獲首要各
犯正法並將出力人員請獎各摺片已明降諭旨照所請獎勵矣
盜匪劉山東等前經官兵擊散後糾眾竄擾黃花甸楊家大城子
一帶復經兵練擊敗擒獲首夥各犯劉山東卽劉發好等四十九
名訊供分別正法惟逆首烏痣李等在逃未獲自應搜捕淨盡以
絕根株前次派出之穆錦恆齡等既據玉明等稱其久畱在外虛
糜餉需卽著准其裁撤歸伍所有剿捕逸匪事宜卽責成該管地
方文武各官實力搜拏不得以賊蹤遠颺致形疏懈奉天匪犯旋
拏旋起此次雖獲犯多名而首惡未除終成不了之局且所保出
力各員朝廷已准予恩施玉明等當傳知各該員弁感激奮興將
逸出各犯盡數搜獲毋任漏網儆敢日久懈生致令賊氛復熾必

將從重究懲不能因出力在前稍從寬宥也逆首烏志李等既經在逃昌圖與吉林地界毗連難免不此拏彼竄著景綸麟瑞嚴飭兩省接壤地方官不分畛域實力協緝以清奸宄而靖地方將此由五百里各諭令知之○諭都興阿奏渡河援剿官軍暨前赴橫城馬隊均獲勝仗派撥官兵駐紮石觜山北以資聯絡並請派大員署理陝甘總督各摺片甯靈踞匪自煽亂以來屢以畏威投誠之說緩我軍心從未大受懲創此次經兩岸官軍先後剿殺每戰皆捷剿辦尙爲得手杜嘎爾見已進攻寶豐參領德勝由橫城順流下駛都興阿並催令伊昌阿統帶前派各軍由二窩子渡河於石觜山北擇要駐紮保護糧道卽著該將軍督飭在事各軍節節掃蕩以期迅滅賊氛其石觜山一帶糧道並著妥爲保護毋稍疏懈杜嘎爾帶兵援應竟能首先陷陣力挫兇鋒孤軍得以保全寶

屬可嘉卽著飭令該副都統勉力圖功乘勝追剿迅掃逆氛同膺
懋賞另片奏見在辦理軍務於地方事宜未能兼顧請簡派大員
署理陝甘總督等語見在江西軍務日有起色昨已有旨諭令楊
岳斌馳赴本任不久諒可起程此時卽毋庸再行派員署理將此
由六百里各諭令知之○予奉天陣亡照磨徐棠建祠○癸亥以
克復金陵祇告 太廟 上前期親詣行禮○諭內閣本年克復
江甯殄除洪逆禮臣諏吉恭擬本月二十六日行告祭禮朕敬先
期於本日親詣 太廟拈香行禮用肅明禋並特降旨將軍興以
來有功死事諸臣再沛恩施懋加卹賞俾功在社稷者慶流子孫
因念鄭獻親王濟爾哈朗怡賢親王允祥功勳卓著炳耀旂常崇
德暨雍正年間所得之 冊文 勅書旌功褒德帶礪山河揭日
月而行俾世守勿替乃其後嗣端華載垣因恣肆狂悖跋扈不臣

賜死革爵既負國家豢養之恩且爲乃祖聲名之玷九原有知能無隱痛其所遺爵秩前經大學士九卿等遵旨會議僉稱端華載垣罪大惡極請將世爵永遠革除爾時如不照議施行恐無以服天下人之心第瞻念成勞心究不忍當經加恩降爲不入八分輔國公並令岳靈載泰世襲罔替所以篤念勳舊者固已無微不至我 慈安皇太后 慈禧皇太后莅政之餘亦時眷懷舊勳愴然動念今當大勳漸集懋賞酬庸之際追維開國之初鄭獻親王忠義勳名載在史策怡賢親王於雍正年間忠誠輔弼懋著勤勞若因端華載垣之故使親賢後裔弗獲世守舊封其何以紹前光而嚴對越所有鄭親王怡親王世錫王爵均著加恩賞還一切紅白藍甲數並佐領人等均著仍復其舊並著宗人府照例於始封立官人之後裔內擇其向有襲次房分排列在前僅止有分房分排

列在後如各房分均屬相同卽以長幼之序排列並將岳靈載泰一併帶領引見候旨承襲其端華載垣子孫及親兄弟姪仍不准其揀選○諭軍興以來所有忠良死事諸臣業經贈官廕卹賜諡建祠飾終之典備極優隆朕建元初年復奉兩宮 皇太后懿旨將戰功卓著忠績懋昭足以表式人倫者賜祭一壇並加恩一律予諡以示軫念本年江甯克復已將在事有功之臣渥沛恩綸庸錫爵因思從前有功死事諸臣或臨陣捐軀齋志以歿或鞠躬盡瘁未竟全功雖業經分別加恩優予卹典亦足稍慰忠魂而其開封疆壯帥功績尤爲昭著者追念前勞尤堪憫惻茲據議政王軍機大臣遵旨查明開單進呈詳加披閱如胡林翼等規畫遠大勳績卓然允宜再沛恩施用光泉壤前任湖北巡撫胡林翼著加恩賞給一等輕車都尉世職前任湖北提督向榮著加恩入祀昭

忠祠前任浙江布政使李續賓著加恩賞給二等輕車都尉世職
前任安徽巡撫李續宜著加恩賞給伊子直隸州知州照例補用
前任江南提督張國樑著加恩賞給三等輕車都尉世職前任湖
南提督塔齊布著加恩入祀昭忠祠並賞給三等輕車都尉世職
前任安徽巡撫江忠源著加恩賞給三等輕車都尉世職前候選
道江忠濟前任浙江甯紹台道羅澤南前任西安將軍多隆阿前
候選同知曾國華均著加恩賞給一雲騎尉世職前卽用知府曾
貞幹著加恩賞給伊子直隸州知州照例補用前提奏提督江西
南贛鎮總兵程學啟著加恩賞給三等輕車都尉世職用示篤念
忠藎有加無已至意○諭滿慶等奏達賴喇嘛從伊正師傅赤巴
羅布藏青繞汪區受格隆小戒呈進佛尊哈達等物一摺本年四
月十三日達賴喇嘛從伊正師傅受格隆小戒實有吉祥之事甚

爲喜悅達賴喇嘛嗣後尤令專習經咒謹守黃教承受朕恩著加
恩賞給達賴喇嘛黃哈達一箇椰子捻珠一串玉盃一箇大荷包
一對小荷包二對著滿慶接奉諭旨諭知達賴喇嘛照數祇領再
達賴喇嘛仍將照例應進貢物交班禪額爾德尼年班堪布來京
呈進卽照所請辦理○穆圖善劉蓉奏啟鄭諸逆與蔡逆合併後
兇焰雖張而我軍節次移師進逼營壘環布逆勢漸蹙臣等以逆
黨中裹脅甚多未可以一律駢誅也乃分繕諭帖曉以利害各就
營壘附近處所投遞賊眾見官軍四面環逼屢次挫敗糧食垂盡
眾志已離及見諭帖許其自新又見葉毓廣等投降之眾安然無
恙遂先後自拔來歸六月二十七日總兵鍾玉勝收降偽都統王
洪恩等五百餘人係屬蔡逆之黨七月初二日提督曹克忠收降
偽天將王克渴彭學進等四千餘人係屬啟逆之黨初三日總兵

黃金山招降中旗僞帥鄭泳和等五千餘眾並將所踞南淇水二堡獻出臣穆圖善以其爲數太多離營又近慮有意外之虞遂列隊親自受降查點五千六百四十餘人係屬石達開餘黨初四日曹克忠又收降僞天將羅啟發徐湑先等八百餘人於是啟逆黨與存者不過三四千人盡被該逆勒入焦家巷堡內初六日臣等調派各軍分路攻剿李百魁率師先至徑攻焦家巷老巢之西逆黨出三四千人列隊抗拒曹克忠見逆勢兇悍遂飭總兵王得勝等畱堵魯馬堡援賊而自率親兵馬隊及參將周有貴並葉毓廣等新舊降卒飛馳策應逆勢不支曳旗退走我軍追殺五十餘名將近堡前該逆復派第二隊突出接戰適金順馬隊與蕭慶高步隊亦皆奮迅而前兩面夾擊斃賊二百餘人時王得勝等亦進攻魯馬堡曹克忠復帶隊往助將堡外木城拔開兩道正在衝擊焦

家巷西堡逆隊又來援應蕭慶高等奮勇猛撲槍礮環擊殲斃長
髮老賊二百餘名該逆且戰且走我軍分路邀截又殲斃百餘名
生擒數十名總兵劉厚基等率師奪卡英毅軍亦賈勇齊進該逆
抵敵不住急將堡門扃閉於是堡外之賊二千餘眾無路奔逃悉
爲我軍殲除淨盡嗣後再四衝突該逆堅伏不出而彭基品之親
兵各營進攻東路者由田峪渡渡河前隊甫抵焦家巷遙見說經
臺之賊搖動白旗急以後隊作爲前隊列陣以待臣穆圖善親督
所部徑擣大玉西堡攻撲兩時未能得手忽降將鄭泳和奮身先
登降眾繼上總兵黃金山攻其西提督劉定邦攻其北三面擁入
乘勢拔殺堡內之賊無復噍類其由南面跳牆而逸者三百餘人
又被衛隊親兵圍而殲之生擒僞巡部僞都統六人僞震天福楊
必南僞智天燕余忠厚何必達任占鼇等西堡旣克復率師會攻

樓觀東堡先是何勝必等率師進剿該逆踞伏不動嗣見我師厚集於西遂相率擁眾出巢我軍分投迎擊遊擊周萬祥等力戰陣亡何勝必堅持不退斃賊多名遂將三明洞攻克逮我大隊馳到蕭慶高等由西北轟擊彭基品等由東北猛攻正在緣梯搶上堡牆不期東南南面之賊分隊來援礮石益厲都司朱得二等均以奮力先登中礮而亡忽魯馬堡之賊又復出隊搦戰曹克忠等奮勇迎敵殲賊一百餘名生擒三十餘名逆眾亦遂退匿堡內其塔峪坡踞匪見參將龔良臣等各軍逼近亦率馬步一擁而出龔子雲奮力迎擊殲斃二百餘名生擒五十餘名其上林木深處亦擁出步隊一二千人齊向各營猛撲張玉文整隊不動俟其撲近槍礮轟擊該逆退走不及墮坡落澗自相踐踏者多我軍乘勢掩殺一百餘人其對面山梁踞賊亦經副將顏明亮等上下夾攻遂將

該逆所踞山梁一律掃蕩_臣等以該逆經此大創勢必乘閒宵遁
卽於初七日拔隊駐紮就峪河東田峪河西以逼之初八九等日
各營以次築成越日函約曹克忠列隊焦家巷一帶遙作進攻之
勢_臣穆圖善亦列隊大玉堡之北以相牽制俾各營得以全力攻
撲樓觀各堡蕭慶高等併力衝入將梅花椿全行拔毀忽西堡突
出馬步援賊二千餘人前來接應都司劉智武中礮陣亡適值大
雨傾注祇得率師而返_臣等伏思兩次猛攻均未得手不如用長
圍坐困之法因傳飭諸軍並函致曹克忠各於營壘數十武之外
掘挖長濠深廣均以三丈爲率一面分塞田峪就峪兩口絕其汲
道以困之忽見樓觀各堡之賊捲旗銜枚紛紛潛竄我軍吶喊出
撲逆眾驚惶無措奪路爬山自相蹂踐掄斬甚多其踞說經臺之
僞將軍李春年爲都統蔣洪順任洪愚等先經約期出降是夕投

出千餘人據供逆眾本期西竄寶鳳不意官軍三面圍剿無路逃生祇得冒雨翻山分路竄走約與諸賊目會於新場再定去向等語何勝必當卽派兵由田峪口馳出邀截其焦家巷蔡啟諸逆正率其黨乘雨圖竄就峪口被曹克忠等阻遏不前乃越山潛遁臣穆圖善聞信立卽親率黃金山等步隊及金順馬隊冒雨馳追黃金山手刃悍賊二十餘名曹克忠亦奮力跟追兩軍合計斃賊千餘人時蕭慶高等由就峪口跟蹤追剿將逸入林中之賊斬擒殆盡而山中悍逆拌命抗拒各軍奮力前突把總余占彪郭清海力戰陣亡我師益憤總兵楊得勝等徒步先登大呼陷陣逆眾紛紛奔潰我軍趁勢掩殺斃賊六七百名生擒三百餘名解散新裹之眾三千餘人該逆不暇喘息悉向秦嶺一帶奪路奔逃伏查蔡啟諸逆由大峪口竄往藍屋銳意窺川圖由棧道前進臣等調撥軍

士由寶雞一路攔截東西夾擊節節逼緊始將逆黨聚於一隅布
列長圍絕其糧道陸續收降前後斬馘以及連日追剿解散之眾
已近三萬見所存者不過萬數千人當可殲諸南山老林之內惟
聞李雲麟一軍至今尙未到防甚慮佛坪等處無兵堵截臣劉蓉
於十三日卽檄飭彭基品等三營馳進使該逆不能遽竄出山擬
於日內由子午谷督剿至前進攻大玉西堡之師降將鄭泳和首
先擒上賊壘實屬著有微勞合無籲懇 天恩賞給五品翎頂傷
亡將弁容臣等彙案請卹 上諭議政王軍機大臣等諸逆合併
後經穆圖善等移軍進逼招降賊眾餘人並將樓觀東堡等
處逆壘攻克該逆向秦嶺一帶逃竄追剿甚眾見籌分路雕剿惟
據該將軍等奏稱此股逆匪經曹克忠由寶雞一路節節緊逼將
逆黨聚於一隅並布列長圍絕其糧道計日卽可殲除自當激勵

將士一鼓成擒乃因大雨收隊縱令樓觀各堡之匪乘機潛竄總由該將軍等督勦不力致勦辦又形棘手劉蓉見擬由子午谷入山堵截者卽會同穆圖善嚴飭所部各軍分路勦洗迅將敗竄南山等處賊匪悉數殲擒徒事尾追令賊蹤竄入甘省惟劉蓉等是問鄂省軍務雖開緊要見有官文等在彼督兵勦辦該大臣營內不乏帶兵之將穆圖善惟當督率將士先將南山竄匪埽除淨盡俟陝省軍務肅清再行請旨李雲麟一軍尙未到防佛坪甯陝四畝地等處必致無兵堵截劉蓉何以不參前因川陝交界防勦喫緊諭令該京堂督率隴軍防勦何以至今尙未到防實屬畏葸遷延不知振作李雲麟著摘去頂帶迅卽親率隴軍與劉蓉所派之兵嚴防佛坪甯陝等處毋任賊匪竄越儼縱賊出山毫無堵截必將該京卿從重治罪決不寬貸招降人眾爲數太多著穆圖善

劉蓉隨時妥爲防範並設法分別資遣毋稍大意所有進攻大玉西堡尤爲出力之降人鄭泳和著賞給五品頂翎以示鼓勵穆圖善所部各營軍餉著劉蓉妥爲籌畫毋任缺乏逆匪前由棧道前進意在窺伺川境此次竄至南山距川省甚近著駱秉章仍遵前旨嚴密防守毋稍鬆勁將此由六百里各諭令知之○諭駱秉章奏體察滇省情形一摺據稱雲南回患變詐百出杜逆竊踞大理馬德新近在省城已成固結莫解之勢馬如龍岑毓英日以勦除杜逆爲詞曾無寸效籌辦滇事必須兵餉充足方能聲罪致討川省見在兵餉難於兼顧並探聞馬德新至姚州議和允將迤西地方分給杜逆不日攻取建南請飭馬如龍等進攻大理誅滅杜逆以明心迹等語滇省糜爛旣久岑毓英馬如龍雖聲稱以勦回自任不過託之空言馬如龍等之助順助逆總以能否攻拔大理勦

滅杜逆爲斷著勞崇光賈洪詔迅卽分檄馬如龍岑毓英等往攻大理將杜汶秀等逆悉數殲除如馬如龍等果能踊躍用命迅速戡事則心迹既明朝廷必予以優獎若遷延觀望陽奉陰違是仍與逆同暗地勾結以虛言爲要求地步屆時勞崇光惟當大申撻伐豈可再事姑容惟兵餉兩層勢必取資川省馬如龍等旣不可恃斷不能置滇事於不問將來定議進剿徵兵籌餉事事仰給於川省駱秉章當隨時設法兼顧不得因本境餘孽未靖稍存歧視卽馬如龍等人尙可用借以剿回亦必須派撥大兵直入滇境分別剿撫爲伊等聲援仍須川省籌餉接濟駱秉章亦不可視爲緩圖前曾屢諭賈洪詔令卽駐紮昭通相機辦理該撫何以遲至此時尙未前往川省距滇甚遠一切事務鞭長莫及必須駐紮昭通就近酌辦何得因該處逼近回氛見無重兵未可輕進遂徘徊川

省真展一籌殊負委任著懷遵疊次諭旨迅卽前往昭通確探滇
省近日情形次第妥辦不准再有遲誤至杜逆有攻取建南之說
是否確鑿著駱秉章密爲偵探先事防範聞徐之銘近已病故岑
毓英已具稟賈洪詔而巡撫關防未據送交著勞崇光飭岑毓英
卽將巡撫關防送交賈洪詔祇領前有旨將李季高簡放甘肅甯
道鎮總兵甘省軍務緊要著駱秉章卽飭該員迅赴新任以重職
守將此由五百里各諭令知之○論文祥奏吐魯番南北各路軍
務喫緊並哈密防堵情形一摺據稱奇台木壘漢回滋事烏魯木
齊所屬之哈必爾罕布拉克等臺漢回搶去馬匹前途喀喇巴爾
噶遜營漢回變亂吐魯番至烏魯木齊道路不通而托克遜漢回
亦乘機肆擾喀喇沙爾烏魯木齊文報梗塞文永帶兵進援庫車
行至距喀喇沙爾所屬之烏沙克他爾軍臺三十里之新井子遇

賊接仗失利等語新疆自庫車不守迤東各城紛紛煽亂竟欲成燎原之勢文永帶兵往援又復挫敗其詳細情形並文永下落著依奇哩查明具奏並著懷遵前旨催調土爾扈特和碩特兩處遊牧蒙兵助剿以厚兵力常清統轄各城責無旁貸疊經諭令派撥勁兵並得力遣犯歸圖庫爾管帶星馳往援著仍遵前旨督飭該員弁等探明道路趨程前進一面查明文永見在何處會同招集兵勇合力進剿如兵力不敷再行添撥勁旅陸續進發毋稍疏虞吐魯番至烏魯木齊賊氛肆起若不趕緊撲滅更恐滋蔓難圖著色普詩新飭令何瑄趕緊挑派滿漢官兵前往援應榮慶就近催調援兵並整飭鄉團實力守禦平瑞業布沖額亦當就見有兵力妥籌剿辦一面迅速馳奏保恆另籌一軍前往助剿並將木城未淨餘孽實力剿洗以靖地方哈密爲新疆門戶防務尤爲緊要扎

薩克郡王伯錫爾能將哈密所屬小回子嚴行約束甚爲可嘉著

文祥會同該郡王妥籌防禦慎守巖疆文祥雖已俯放烏魯木齊

提督見在保恆不能到任文祥卽不能交卸起程所有一切防剿

事宜務須謹慎圖維毋稍大意將此由六百里各諭令知之○調

李棠階爲禮部尙書以單懋謙爲工部尙書齊承彥爲左都御史

調王發桂爲刑部左侍郎以汪元方爲禮部右侍郎由左副都御史遷○

廣山西鄉試中額二名○廣江西德安山東聊城學額各一名○

甲子以克復金陵遣官告祭 天 地 社稷 太廟 永陵

福陵 昭陵 昭西陵 孝陵 孝東陵 景陵 泰陵 泰東

陵 裕陵 昌陵 昌西陵 慕陵 慕東陵○諭內閣左宗棠

奏覈減甯波府屬浮收錢糧一摺浙省甯波各屬所徵地漕南米

等項浮收之弊在所不免經左宗棠查明覈減將甯波所屬一廳

五縣六場所所有錢糧收納實數暨流攤各款除正耗仍照常徵解外其一切攤捐名目及各項陋規概行禁革共減去錢十萬四千有奇米八百餘石民困諒可稍蘇卽著照所議辦理嗣後並著爲定章永遠遵行從前以錢數收納者悉令統照銀數收納不准有大戶小戶之分至地方官吏尤當潔已奉公剔除積習儆敢陽奉陰違添設名目格外需索及大戶不遵定章完納者卽著該督撫查參懲辦以重國賦而恤民瘼○楊岳斌沈葆楨奏據鮑超移營進紮七里岡查看該逆自雙鳳嶺至許灣徧築賊壘七月初四日調派各軍分路環攻逆眾亦出大隊排列長濠我軍冒險直前極力猛撲先將雙鳳嶺賊壘踏平並將琉璃岡等處賊壘以次踏毀赤橋突出伏賊萬餘周有勝等三路鈔擊乘勢攻毀尙莊賊壘張玉田亦拔許坊賊營許灣等處復出悍賊二萬餘人鮑超督飭

周鵬舉等前後夾擊將賊衝爲數段賊乃大敗各軍四面掩殺匪黨死傷枕藉隨將許灣賊壘一概削平我軍追殺十餘里斃賊約萬餘人生擒一千餘人內有僞東平王翟添溫等賊首十一名悍賊三百餘名救出難民三千餘人奪獲旗械無數崇仁之賊經浙江臬司劉典督飭周勝祥等率隊掩殺六月二十六日該逆出大股拒敵我軍仍分路前進劉典率親兵包出賊前該逆四散狂奔殲斃無數當將該處賊巢焚毀約計斃賊五六百人解散脅從六七百人是日江席兩軍亦出隊攻城賊匿不出七月初六日劉典派劉勝祥等分攻城外賊壘並約會總兵江忠朝按察使席寶田三路猛進槍礮轟擊賊多應聲而倒共計斃賊千餘人連日乘勝攻剿均獲大勝擒斬悍賊約數千名初十日劉典令劉勝祥逼城紮營以便與江席兩軍環攻賊愈震恐侍逆等股卽於是夜悉數

遁歸宜黃十一日黎明收復崇仁縣城派隊跟追三十餘里又殺賊數百人東鄉踞城之賊於東北隅添築三壘二十四日提臣周寬世總兵王開琳道員王德榜各率隊伍逼城而陣賊出悍黨數千馬隊數百龔隆貴等且戰且退誘至涼亭之前三路伏兵齊起龔隆貴等亦乘勢回擊賊眾奔潰立斬騎馬賊首並賊黨二百餘人追抵城根而還連日賊隊出戰均爲我軍擊敗初十日周寬世移紮距城四里之大埠港王開琳王德榜亦各派兩營進紮五里亭逼攻城賊槍斃僞主將宋逆匪眾驚潰我軍四面拋射火彈火箭賊壘登時火發焚斃逆匪無算時已黃昏各軍知賊勢已蹙必將宵遁派隊伏於近城村舍是夜賊果開東南兩門望金谿狂竄周寬世等派隊尾追十餘里斬馘數百奪獲器械不計其數當將東鄉縣城收復共計殺賊千餘名生擒四十餘名解散脅從不少

臣等伏查鮑超督率勁旅直擣許潛翦除巨逆崇東之勢已孤劉典等亦連日苦戰遂得克復兩縣城池各軍冒暑攻勦力摧大敵勞苦異常厥功甚偉可否准臣等擇尤保獎出自天恩至遊擊楊維慶等血戰捐軀殊堪憫惜另繕清單應請飭部從優議卹又奏據提臣鮑超文稱初十日率隊進攻金谿行至長岡鋪見近城之楓山鋪賊壘十五座兩旁山岡排列賊隊城賊接踵而出陣於山谷鮑超令唐仁廉等督率步隊分三路齊衝山岡另用馬隊兩面包鈔壓戰二時之久逆眾大敗我軍直壓楓山鋪將十五壘一律踏平乘勢追抵北門城根城上礮石如雨各將士勇氣百倍冒險進攻周有勝將北門外賊壘七座踏毀王衍慶等由東門水門斬關而入該逆率黨從南門出竄雲慶等追殺十餘里餘匪望瀘溪遁去遂於是日戌刻收復縣城是役斃賊約數千餘人擒獲

長髮老賊二千餘名內有僞城天豫莫自城等賊首九十八名拔
出婦女三千餘人奪獲大礮三十六尊劈山礮擡槍鳥槍一千三
百餘桿麻馬五百餘匹旗械萬餘件等情臣等查鮑超一軍甫經
掃平許灣賊壘不數日即進攻金谿先掃逆壘立拔縣城實屬非
常勇敢卓著戰功所有在事出力人員可否容臣等一併擇尤請
獎又奏據撫標中軍參將韓進春稟稱南豐之賊分踞新豐地方
漸逼建郡六月二十八日我軍馳至上塘逆眾倉皇出拒曾天發
等左右分鈔賊乃大敗狂奔我軍四面截殺斃賊二三百名生擒
五十七名內有僞應天福劉克衝一名當將上塘賊館掃平七月
初三日進剿襄塔墟等處賊皆聞風先遁而東路長興地方復有
賊擾韓進春飛調董德春等進剿賊亦望風遠颺等情臣等查見
在崇東等縣克復大軍分路進剿正敗賊奔竄之時建昌地處要

衛已嚴飭韓進春實力堵禦毋任闖入 上諭議政王軍機大臣等江西各股匪分踞金谿東鄉宜黃崇仁南豐五城不數日間已克其四鮑超於削平許灣後進攻金谿破數萬賊眾如拉朽摧枯實屬勇敢異常戰功卓著著楊岳斌沈葆楨傳旨嘉獎仍飭各軍乘勝進攻南豐以期一律掃蕩摺片內所稱擒斬之偽平東王翟天鳳等十一名成天豫莫自成等九十八名均非著名賊首所有李侍賢汪海洋陳炳汶等逆均未聲敘曾否傷斃抑已另竄他處著該督撫查明具奏宜黃收復情形賊竄何路諒已有奏報在途南豐一城無難唾手而得該逆不窺甯都必擾建甯甯化如竄至閩境務須不分畛域認真追剿並飛咨閩省督撫嚴飭防軍會剿毋令再擾完善另片奏韓進春一軍駐守建昌在新豐之上塘等處獲勝而東路長興地方復有賊擾著卽督飭該參將實力防堵

見在西北之患甚於東南甘肅及回疆軍情均甚緊急昨諭知楊岳斌能否卽赴陝甘總督新任計奉到前旨該督卽當與曾國藩通籌大局如江西軍務稍鬆接替有人卽著該督仍遵前旨酌帶所部得力兵勇數千整旅前進抵任後將良莠各回分別勦撫仍著與曾國藩妥商奏聞以期周密將此由六百里各諭令知之○諭李雲麟奏通籌興漢防勦機宜請飭興安官民捐備倉儲並管涉等辦理團練各摺片據稱蔡逆自竄至陝北後與啟逆梁成富僞天將馬仕榮范立川等懼勦協謀如由陝北入山處處可達興漢惟有居中策應駐軍石泉甯陝西鄉一帶擬於七月十五日以後將水陸各營分紮該處等語昨因李雲麟一軍日久尙未到防當將該京卿摘去頂帶著李雲麟仍遵前旨親率隴軍與劉蓉所派之兵嚴防佛坪甯陝等處該京卿於防勦失利及縱賊竄逸往

往以兵單餉絀事權太輕呼應不靈等詞藉口以遂其文過飾非之計經此次嚴諭之後如再一味畏葸任意遷延縱令該逆出竄必將李雲麟從重治罪懷之建毅六營前已諭令李雲麟准其先行撤回著仍遵前旨應撤者妥爲裁撤交金殿安等管帶回鄂以免虛糜餉項該京卿請飭四川督臣於分防川界各軍中酌撥二千人移紮漢中昨以該逆竄至南山距川甚近已諭令駱秉章嚴密防守矣李雲麟擬於興安府城設立團練總局將所屬各縣各舉公正紳耆按照安康漢陰章程一律辦理而以管涇蔣常垣黃加焜總司其事卽著劉蓉酌度情形責成管涇等妥爲辦理興安倉庫俱無毫無布置若派兵駐守新舊兩城非二千人不敷分撥無兵畱守興城萬不可保李雲麟擬於興安附城內外中上各戶派捐銀穀所收之穀立爲義倉專備守城之用所收之銀製造

器械修補城垣該京卿所籌是否可行著劉蓉斟酌辦理慮又能於漢中失守時開城出走縱勇恣掠情罪極爲可惡前諭陝西湖北四川各省一體嚴拏務獲就地正法時閱七月之久尙無該革員下落著劉蓉趕緊緝拏懍遵前旨於拏獲後卽行正法以昭炯戒將此由六百里各諭令知之○以浙江金華等處水災飭左宗棠分別撫恤○予江西陣亡遊擊楊維慶祭葬世職○乙丑諭內閣前因喬松年奏保蒙城解圍出力各員業經降旨均照所請獎敘茲據僧格林沁奏稱查覈該撫奏獎單內按察使英翰請賞勇號該員帶兵止在小澗集紮營嗣經援軍大至始行移營會剿正未身先士卒都司施紹恆請以副將儘先補用該員係由該大臣派往援剿未及數日城圍卽解在蒙並未續有戰功徐登善請以遊擊儘先補用並賞加勇號該員係由捻黨於克寨後投誠卽有

勞績亦應先免其爲匪之罪不應以先得官階接續請獎守備李勤邦請賞換花翎並賞加都司銜六品軍功楊步斗請以守備儘先補用該二員均經該大臣於蒙城解圍後保奏有案該撫請獎係出重複請旨撤銷各等語所有英翰施紹恆徐登善李勤邦楊步斗五員此次獎勵之案均著卽行撤銷仍俟續有勞績再行奏請近來各省軍營出力人員一經保奏朝廷無不立沛恩施在統兵各大員自應覈實奏獎豈容稍有冒濫此次保獎之案喬松年到任未久未能深悉底蘊其原摺內稱係據英翰開單呈報英翰久歷行間乃竟重複開報浮冒請獎喬松年並未詳覈率行具奏均有不合若非僧格林沁悉心察覈浮濫之弊何由上聞喬松年英翰均著交部分別議處以爲冒濫請獎者戒此外各省保獎之案似此者諒亦不少各路統兵大臣及各省督撫務宜畱心察覈

一有聞見卽當隨時奏聞如再有濫請獎勵者一經查出除將該員獎案撤銷外必將原保之員從重懲處決不寬宥毋謂朝廷名器可濫邀也懷之愼之尋吏部議上喬松年降一級調用英翰降三級調用俱係私罪毋庸查紀級議抵得旨喬松年著加恩改爲降三級畱任英翰著改爲降五級畱任○僧格林沁奏髮捻各逆麤集麻城經臣疊飭翼長蘇克金總兵張曜等節節移營實力勦辦自六月十八日起各營分紮麻城東北門外後路官軍仍紮黃土岡其伍家河等處均撥官軍駐守英翰一軍亦到麻城協剿七月初三日蘇克金等由閩家河古梅寺等處兩路進兵計斃賊匪數十名生擒二十餘名旋有僞天將桂子春率眾投誠經該翼長等收降一百十餘名作爲前敵初七日英翰在柏子塔附近四五里築壘張曜派遊擊楊春祥亦同至南山頭紮營該逆分兩股來

撲我軍奮勇迎擊賊卽敗退初八日蘇克金等仍向閭家河進兵一路乘勝埽蕩計奪賊壘十餘座村莊四十五處生擒三十餘名維時英翰之軍進攻東路小山觜追至閭家河以東賊卽棄營逃走又奪賊營十餘座賊館三十餘處擒斬五十餘名初九初十等日探得烏石山有無數賊旗當卽齊隊由牛棚山進剿直追至高岸河連拔賊壘二十餘處襲殺二十餘里共計陣斬髮逆三四百名被擊落河死者三四百名生擒二十餘名次日僞扶逆陳得才大股來撲紅石堰約有萬人蘇克金張曜督隊衝擊約斃賊六百餘名生擒長髮賊一百餘名賊敗入山惟蘇克金行至中途受暑昏迷旋報出缺臣以攻剿正當喫緊卽派副都統成保暫署翼長接統蘇克金所部之隊並責令英翰等軍乘勝進剿旋據英翰等稟稱十二日夜間有擒首宋朝如赴營乞降計有一千七百七十

一名英翰擇畱四百名派在前敵立功贖罪其餘均遣令還鄉賊中自宋朝如投誠後眾皆驚恐乘夜向東南逃竄又據署翼長成保等稟稱陳得才等大股賊匪仍聚麻城西南閔家集正南白杲等處我軍立即移營城南會合楚軍進剿等情臣查髮捻各逆麇集麻城兇經我軍疊次進擊已將城之東北踞匪殲除殆盡惟城南白杲一帶賊勢尙重自應併力會剿儻賊匪因無巢穴可歸仍復西竄一入深山峻嶺剿辦又形棘手惟有督飭成保等會合楚軍實力剿辦一俟秋分以後臣卽當親督馬步各隊相機兜剿至總兵陳國瑞前經臣札調由三河尖商城一路馳赴麻城會剿該鎮展轉遷延月餘尙未到營實屬不知緩急除將所部之隊飭交總兵郭寶昌管帶外相應請旨將頭品頂戴浙江處州鎮總兵陳國瑞交部嚴加議處陣亡把總蔣慶祥守備閻樂天均堪憫惻應

請旨交部照例議卹 上諭議政王軍機大臣等麻城北路賊匪
經官軍由黃土岡伍家河八道河紅石堰等處節節進逼疊獲勝
仗擒首宋朝如率眾乞降經英翰擇畱四百名充當前敵餘皆遣
令還鄉卽著該親王妥爲辦理毋令再生反側惟宋朝如投誠後
賊眾驚恐正可趁該逆惶懼奔竄不定之時乘勝進兵以收破竹
之效官文身任兼圻勦辦本省賊匪是其專責此次僧格林沁所
部疊獲大勝並未見官文派出各軍協同勦洗藍斯明等分紮斬
各隘姜玉順早由樊城拔營得力步隊甚多何以並不進兵會
勦官文所司何事似此任意遷延殊屬不知緩急著官文嚴檄各
軍會合僧格林沁官兵聯絡聲援將麻城南路白杲一帶之賊實
力進剿爲一鼓聚殲之計毋得專恃僧格林沁客兵轉得置身事
外以致日久無功蘇克金所部將士該親王見令成保暫爲接統

惟成保前在直東帶隊頗不得力此次派令管帶蘇克金馬隊未知能否勝任著卽責令該革員奮勉圖功以贖前愆仍著隨時察看如不得力卽行更換據獲賊供稱該逆圖竄東北是商城光山一帶又形喫重著張之萬激勵將弁實力堵剿毋令匪蹤再行闖入豫疆前賞蒙古兵丁銀一萬兩據該親王奏稱見在哲里木昭烏達兩盟隨營征剿至土默特官兵亦在營隨同出力等語此項銀兩卽照僧格林沁所請將該兩盟及土默特官兵均勻分賞其管帶各盟馬隊人員及吉林黑龍江帶隊員弁僧格林沁擬俟麻黃股匪撲滅再行奏請獎勵該親王慎重名器不肯稍涉冒濫具見公忠體國之忱陳國瑞已據該親王調令來營仍著隨時酌量差遣僧格林沁密摺一件畱中將此由六百里各諭令知之○曾國藩奏臣初到金陵擬令將士休息一月卽派剿廣德等處乃請

將盛暑鏖戰病者甚多紛紛請撤勇回籍臣以皖浙未靖本不欲遽撤多營惟念近歲以來勇丁有募無散有增無減需餉甚鉅今幸老巢既破大局釐定裁一勇卽節一勇之糜費亦卽消無窮之後患因與臣弟曾國荃商定將金陵全軍五萬人裁撤一半酌留二萬數千人分守金陵蕪湖金柱關各要隘其餘作爲遊擊之師進剿廣德等處曾國荃克城之後困憊殊甚徹夜不寐有似怔忡據稱心血過虧意欲奏請回籍一面調理病軀一面親率遣撤之勇部勒南歸臣屬其勉力支持不必遽請開缺姑在金陵安心調理代臣料理善後事宜臣卽日仍回安慶營次俟上游布置稍定再行馳赴江甯至於鎮江之兵臣與馮子材面商似可全行裁撤揚州之兵臣與富明阿面商目下尙難遽撤俟鄂中大定乃可酌量裁減軍興日久各將弁亦有厭苦戎行之意但使欠餉有著遣

散時當不至別生枝節足慰宸廑江西軍務楊岳斌過安慶時臣與之商定以後鮑超周寬世戰狀卽歸該督具奏上諭曾國藩奏李臣典出缺蕭孚泗丁憂及料理善後布置上游並李秀城等業經正法各摺片本日已分別降旨將李臣典賜卹蕭孚泗准開缺回籍守制矣各處勇丁有募無散有增無減原因兵力不敷不得已而用之江南已克大功脩成該大臣酌量可以裁撤二萬餘人且體察各員弁久在行閒厭苦兵事不至另生枝節自屬實情著卽籌發欠餉酌量遣撤總須有約束之法鈐制之人方不至游騎無歸另謀嘯聚致貽異日無窮之患其酌留之二萬數千人卽令分守金陵蕪湖金柱關各要隘兼作爲遊擊之師進剿廣德等處並著妥爲調派以資得力據奏曾國荃於克城之後心血過虧困憊殊甚欲請回籍調理部勒散勇南歸求所爲善始善終之

道等語該撫所見雖合於出處之道而於盡臣謀國之誼尙未斟酌盡善况遣散勇丁止須分派妥靠之員沿途照料而見在江甯安慶等城均須督兵鎮守該撫正宜駐紮江甯安心調理一俟就痊即可幫同曾國藩分任其勞卽著曾國藩傳旨存問無庸遽請開缺回籍江南北應辦善後之事甚多曾國藩見回安慶著卽趕緊料理上游事務布置稍定卽仍回駐江甯鎮江揚州防兵應撤應兩均照所議辦理江西已克宜黃崇仁金谿東鄉等城惟賊首尙未就殲近日新疆名城警報疊至是以前諭楊岳斌馳赴新任楊岳斌能否離江江西軍務應交何人督辦該大臣卽遵疊次諭旨迅速籌奏李秀城等就地正法所辦甚是前已有旨宣示矣洪秀泉首級未經傳示各省卽由該大臣自行咨明各處可也將此由六百里諭令知之○以赴調遷延湖北軍營總兵官陳國瑞下

部嚴議○予江南江甯傷亡總兵官李臣典祭葬世職加等諡忠壯於江甯暨江西吉安安徽安慶各地方建祠○丙寅諭議政王軍機大臣等官文奏髮捻勢已窮蹙欲循舊路回竄見飭各軍合力進剿並續獲勝仗各摺片髮捻各逆麇聚於麻城白果等處經成大吉等軍與僧格林沁派出各軍分路剿洗賊糧將盡勢已窮蹙兼之金陵克復無巢可歸其自拔來歸者亦復不少自應乘此賊心渙散之際合力兜剿以期迅就肅清官文見飭姜玉順等馬步各軍嚴扼黃孝要路會合楊朝林等軍三路進兵爲聚而殲旂之計卽著督飭諸軍實力進剿一鼓滅賊不得稍有遲延僧格林沁派出之軍轉戰而前所向奏績卽著飭令色爾固善張曜等乘勝進兵會合楚師將髮捻各逆全股殲除毋稍鬆勁惟該逆詭譎異常避兵而行是其慣技官文奏稱逃出難民僉稱賊匪備十日

乾糧並紮草人圖由舊路回竄而羅田蘄水等處之賊悉數竄至
道觀河沙河一帶沿村打館是其急欲上竄情形畢露見在富森
保石清吉等雖於道觀河扼紮營壘逼賊而軍第該處道路紛歧
難保不乘虛竄豫著張之萬恪遵歷次諭旨激勵將弁實力堵剿
毋令匪蹤再行闖入豫疆致剿辦又形費手將此由六百里各諭
令知之○丁卯諭內閣內閣奏遵照定例請舉行釋奠典禮一摺
本年克復江甯殲除首逆自應遣官釋奠先師孔子用告成功
所有應行典禮著該衙門照例辦理○諭前經降旨將鄭親王怡
親王世襲王爵賞還令宗人府照例於始封立官人之後裔內分
別排列與岳靈載泰一併帶領引見茲據宗人府奏稱前次辦理
承襲鄭親王怡親王所降不入八分輔國公時曾將英俊載堉等
依次排列帶領引見此次應否仍將英俊載堉等復帶引見抑或

另行揀選並將英俊載堦等依次排列等語著宗人府另行揀選
合例之人並將前次揀選列名之英俊崇吉文霖承歡載堦載熙
載熙依次排列一併帶領引見○諭議政王軍機大臣等明緒等
奏烏魯木齊一帶地方回匪肆擾貢馬不能呈進麟興等札調蒙
兵馳赴古城聽調各一摺烏魯木齊漢回變亂業經保恆等馳奏
明緒等見據護送貢馬官兵旋回報稱烏魯木齊迪化漢城關外
回匪縱火紅山薺子一帶火光皆起滿城城門封閉護馬官兵被
賊衝散是烏魯木齊匪勢正熾起釁根由暨見在若何情形仍著
明緒平瑞業布冲額等探明確迅速具奏一面將塔城回眾妥爲
撫馭各安生業毋受外匪煽惑致啟猜疑該處回民旣肯隨同官
兵分路防堵卽令該掌教擇派妥靠之人隨同各營員前往以釋
其疑該兵丁應領鹽菜銀兩務須設法籌給麪斤錢文以資接濟

石金斗陳生福等既爲回眾敬服卽著飭令彈壓回眾如能始終出力卽行奏請獎勵以堅其向化之心塔城鄰氛不靖自應先事豫籌該處兵力較單著常清挑選精壯兵丁五百名聽候該大臣咨調以備緩急明緒等亦須時加嚴防毋稍大意所貢馬匹著俟明年補行呈進以免疏失烏城變亂情形未據平瑞等陳奏其爲城垣戒嚴道路梗阻可知著平瑞業布沖額懍遵前旨就存城滿漢各營兵勇迅籌防剿以期痛殲醜類毋任蔓延古城待援甚急見在南路各城不能兼顧著麟興車林敦多布卽行飛札西兩部落盟長於各旗內挑選精壯官兵五百名由麟興等發給軍火馳赴古城應援此項官兵口糧著保恆照例妥爲豫備毋令缺乏將此由六百里各諭令知之○諭總理各國事務衙門奏荷蘭國換約屆期請派員互換一招荷蘭國前立條約載明一年期內或在

天津或在上海互換茲屆換約之期據該國公使轆大何文呈遞
照會內稱請派員往廣東互換等語著派郭嵩燾將上年與荷蘭
國所立條約妥爲互換其條約各本俟崇厚派員齎送至廣東時
卽著郭嵩燾祇領辦理並令軍機處將寄諭摘錄一併發往如該
使索看憑據卽可給與閱看俟換約事畢此旨仍繳還軍機處備
查總理各國事務衙門摺一件崇厚遞到該使照會一件著鈔給
閱看將此由五百里諭令知之○戊辰諭議政王軍機大臣等有
人奏湖南巡撫惲世臨陽託正直陰受苞苴甚自知府以至升任巡
撫營私戕法任性妄爲官局之外另抽商稅聽信戚黨見保知縣
張昆祁等招權納賄於委員外另添代理名目並侵那局款勒派
屬吏剋減火槍價值以候補道員胡鏞在籍道員黃冕爲爪牙用
硃筆標籤將各局帳簿調至署中私行改易民怨沸騰各等語封

疆大吏表率羣僚責望綦重宜如何激發天良正己率屬若如所
參憚世臨貪汚各款殊屬有玷官箴大負委任著胡家玉張晉祺
於川省科場事竣卽行馳赴湖南省城按照開單各款秉公嚴密
查辦據實參奏並將交通賄賂之官親張昆祁等提案嚴訊務期
水落石出不准稍涉瞻徇毛鴻賓見已升任粵督其前在湖南巡
撫任內有無賄和控案及收納部民之女各款並著詳細訪查據
實參奏原摺單著鈔給閱看又有人奏毛鴻賓在湖南時曾因道
員李明墀結交肅順私書甫發肅順伏誅該督派武弁張遇恩連
夜馳驛追回故免敗露等語李明墀見任湖南糧道著卽提訊明
確一併具奏無任狡飾又有人奏湖南地方近來軍功保舉冠蓋
相望士習民風漸多驕悍見在東南軍務漸平各營楚勇將次裁
撤此輩習於戰陣人數又多回籍後恐難安靜全賴地方大吏賢

能公正方足以資彈壓而弭變亂若貪污大吏先爲士民所不齒
安望其能有所整飭耶憚世臨等被參款蹟胡家玉等必須徹底
查辦一俟奏聞即可另簡賢員畀以重寄以冀有所挽救該京卿
等當仰體此心斷不可敷衍了事所有該省士習民風是否驕悍
並著於抵省後訪察具奏原片並著鈔給閱看將此由五百里各
密諭知之○諭憚世臨奏楚師越境勦辦黔匪獲勝另股苗教匪
徒竄逼沅晃邊界增兵防剿並官軍入江籌防一摺楚軍自攻克
盤石營長坪後由銅仁松桃轉戰而前疊破賊巢包毛仙帶領四
五百人循山僻小路竄入梵淨山包逆之子業已殲斃著憚世臨
督飭周洪印等實力搜捕務將包逆拏獲以期盡絕根株天柱城
賊退出後復有僞九大王統苗教二三千人圖犯晃屬涼繖等處
經官軍擊退並將由拉那下竄之僞大王龍政邦等悉數擒獲惟

天柱所駐黔兵糧盡各散柱屬四境徧地賊氛沅靖晃三屬邊隘到處喫緊勞崇光張亮基於該省官兵糧食缺乏何以一籌莫展並不豫爲籌畫任令紛紛潰散黔匪一日不滅卽楚邊一日不安若非兩省合力會剿該逆任意奔突勢必終無了期著勞崇光張亮基激勵將弁奮勉圖功會同楚軍認真掃蕩不得專恃楚省客兵轉得置身事外仍著惲世臨督飭派出各軍將黔省賊匪痛加殲滅以剿爲防庶可次第肅清邊圉江西金谿宜黃崇仁均已攻拔剿辦極爲得手惟該逆弗獲逞志於江勢必改圖他竄秋深水落贛河可以鳬渡誠不可不豫爲之防惲世臨擬飭趙煥聯分軍進駐袁州兼顧吉安將守城三營調赴萍鄉王永章一軍亦分營出境省城防務改委李光燦接辦卽著照所籌妥爲調撥如江省賊勢已蹙無須越境籌防仍著惲世臨酌度情形相機辦理將此

由六百里各諭令知之○予貴州陣亡遊擊王國學祭葬世職○
是月豁免河南陝州等三州縣被兵車戶應賠麥糧江蘇安徽各
屬被擾節年民欠漕稅緩徵直隸東安等三縣被水額賦旗租甘
肅河州等十三州縣山東博興縣被災被擾被雹新舊額賦